

北鎮縣志

卷六

藝文

文以載道道外無文蘇子瞻謂為文必與道俱朱子非之者謂其
言猶有視文與道為二之弊焉自後世判學文學道為兩事逞新
奇者妄為牛鬼蛇神之詞以驚世而炫俗自以為登作者之堂探
元音之妙矣而於經世理物發揮至道渺不相關由君子觀之曾
土飯塵羹之不若耳晚近歐風東漸異說紛起非法侮聖之言愈
出而愈奇道統將湮文於何有殊於是有所文將喪之懼焉掇拾
綴輯亦等於守闕抱殘而已志藝文第六



藝文

元

勅授廣寧府路儒學教授張元美

御香代祀記

醫巫閭在舜封十有二山之一其神秩祀於天子尚矣唐以山為北鎮神封廣寧公宋升王號皇元龍興朔土是鎮首在邦域之中混一以來視他鎮尤為密邇加封真德廣寧王歲一遣使致祭知所本哉至正七年春二月天子函香祝冊賜錦幡泉幣遣內八府宰相臣理伯奴翰林待制臣也先不花以二十二日乙未代祀祠下使命恭肅守臣服勤羣僚職事莫不洗心滌慮以冀感通三獻之際異香苾芬工樂奏和祥飈旋庭星漢動色凜乎如見王靈之

歆享祀禮既成雨物應時庶類蕃殖神之介福其在是歟夫幽明之故昭格之理在乎一誠之孚達爾謹摭梗概文之堅珉後之覽者將有考焉

明

禱雨告北鎮廟文

英宗

予奉天育民愧涼於德致茲久旱災及羣生夙夜省躬中心惓切神司方鎮憂憫諒同雨農於晴宜在其手特茲致禱尚冀感通弘布甘霖用臻豐稔匪予之惠時乃神庥

告北鎮廟文

憲宗

國家欽奉神明聿嚴祀事所期默運化機庇佑民庶乃近歲以來

或天時不順或地道欠寧或雷雷失常雨暘爽候或妖孽漸作疫
癘交行遠近人民咸遭饑饉流離困苦痛何可言惕然於中罔知
攸措惟神奠鎮一方民所恃賴睹茲災沴能不疚心是用特具香
帛遣官祭告尚冀體上天好生之德鑒予憂元元之意幹旋造化
弘闡威靈捍患禦災變禍為福庶幾民生獲遂享報無窮
神其鑒之

祈雨告北鎮廟文

孝宗

伏自去冬無雪今春少雨田苗未能播種民庶實相憂惶予甚兢
惕用側修省虔致禱祈惟神矜憫小民幹旋大造早霑甘霖以滋
禾稼以濟民艱庶年有豐稔之祥則

神亦享無窮之報

平寧藩告北鎮廟文

武宗

去歲以來寧孽作逆命官致討逆黨就擒內變甫清中外底定匪承洪佑曷克臻茲因循至今未申告謝屬者四方多事水旱相仍餓莩載途人民困苦盜賊嘯聚勦捕未平修省咎由實深兢惕伏望神慈昭格幽贊化機災沴潛消祥禎叶應永庇生民

即位告北鎮廟文

世宗

惟神功參造化永鎮北土奠安民物茲予嗣承大統謹用告祭神其歆鑒佑我國家

北鎮廟記

巡撫 王宗彝

舜即位分冀醫無閭之地為幽州於時分州十二各封一山以為
一州之鎮醫無閭山即幽州之鎮也按書傳及職方氏俱作無後
變無為巫考之廣寧志云山在城西五里廟在山南今驗地理城
西五里無山又云清安寺即今觀音閣在閭山內去城十二里今
閭入山僅二里許則是山距城十里與今地理步數正合而志云
五里者傳寫之訛也今廟在山之陽去山五里四分里之一距城
三里四分里之三唐開元中封山神為廣寧公金加封為王元以
閭山密近邦畿大德間加封真德字歲祀與嶽瀆同元季值兵燹
止遺正殿三間我太祖高皇帝洪武二十三年於寢殿之南建瓦
屋三楹左右司各一間別於廟東建宰牲亭神庫神厨各一間繚

以垣牆春秋命有司致祭太宗文皇帝永樂十九年特敕所司撤其舊而創構前殿五間中殿三間後殿七間殿前又構御香殿五間以貯朝廷之降香通為一臺高丈餘周鑿白石為欄後殿前左右各建殿五間前殿前東西各建左右司十一間又建神馬門及外垣磚甃朱門通二層入門以漸而高就地勢為之也歷歲滋久鴛瓦日脫椽木漸朽簷宇傾垂梁棟欹斜每遇霖雨浸及神座先是守臣以邊事旁午不暇及此成化戊戌鎮守太監韋公朗自開原遷此到任三日謁廟觀之惕然不寧謂前巡撫陳公鉞總戎緄公謙曰吾輩奉命守是方為神人所依今一方山鎮之神廟壞弗安則鎮守之臣豈得自安乎是當急為修葺也二公是之於是命

官董其事鳩工市材凡殿宇及左右司門牆朽腐者撤而易之傾斜者扶而正之損者修之葺之廢者營之補之又得監鎗監丞洪義總儲郎中金迪協守參將崔勝咸加贊襄之力材用不取所司工力不勞軍士經始於是年秋九月落成於成化癸卯夏四月廟貌煥然一新告成之日太監與總戎請予紀其事以垂於後用是記之

遼右書院記

賀欽

弘治癸丑秋南燕繡衣樊公按治東土以教育人材為首務乃選河東西諸生之優等者庠各有差建遼右二書院分處之讀書其中以相切磨延學中老成師儒主之復命官典薪米供億之費院

額之匾巡撫都憲河東張公九雲之所署也樊公臨古宜枉顧病夫請為遼右書院記欲成諸生而久斯院辭以迂鄙不足辱命繼而託分守參戎金台王公彥箴懇求不已乃為一言夫古今之道一而古今之學不能一蓋古之學者將以明此道而體於身足乎已而及乎物非若今之學者務誦讀工組織要聲光徼利祿而已此義利正邪之分而治道隆污生民之休戚所係焉者予不能苟同流俗謹取紫陽文公之教於白鹿者躬勉以誨子弟暨館下之生時人不迂闊之者鮮矣今樊公之記斯院者不我迂而惓惓是託公其有意於法古乎則亦遵文公之規而已蓋其所示立教之目為學之叙修身處事接物之要炳然俱在至所謂誠明兩進敬

義偕立其丁寧之意逾益深切諸生由是以進高乃志正乃學實
乃功以祛習俗趨利之鄙陋吾知德成而才富體立而用行進足
以匡吾君而澤吾民退足以化其鄉而善其俗夫然後古聖賢垂
教之意可以不悖朝廷育才之心可以無負而樊公之建斯院與
夫憇惠而成之者亦皆有光於無窮矣嗟夫此固諸生之所以成
而斯院之所以久者與書曰事不師古以克永世匪說攸聞故敢
以是為諸生勸敢以是為將來告樊公名祉字介福丁未名進士
是役也提調者參戎王公銘督工則都閩魯公勲云

史氏倚廬記

賀 欽

史氏祖山東東昌聊城人今為古宜金紫巨家君名璠字公玉昭

信校尉百戶公諱鑛之三子也生而剛明自好雅重鄉里雖處屋
市而衣冠言動簡飭不少慢浮薄者或謂之曰乃亦士夫耶君惟
自信而已既而遣其仲子冊從病夫遊病夫不能專事口語文辭
以取青紫必首以文公小學使人讀而躬行之迂之者恒多史公
乃能於其家亦取小學學焉誚之者亦甚而君之自信益篤弘治
五年仲冬日母安人劉以壽終哀毀如禮乃於中門之外縛數椽
為倚廬居焉絕酒肉遠帷薄且未嘗一造親故之側以終喪制又
常以其自置居第讓其季焉是其行誼今之士夫每每難之矧流
俗之浮薄者耶嗟夫禮教之壤久矣滔滔者固無足言而仁人孝
子之間出者復往往舍神靈而守塚墓孝有餘而學不足守先王

中制者希矣故記史君之行於其廬以世其子若孫且以告吾之鄉人

贈金德容之任石州序

賀欽

弘治丁巳仲冬吉月古宜金德容之任石州幕友人戶科給事中賀欽時病居於家令其子士詔書贈德容曰當官三事古今所尚德容平生自誓曰居官取賄天罰其嗣又能謙謙自收不忤於人自遊京師十數年來安於儉約常假貸以自遣若是者可謂有志於清慎勤者矣况德容歷事刑曹國朝憲章擬議熟矣讀書讀律修己治人尚可謂無術者耶茲行也首舉一州與賢太守相可否布善政以蘇窮民必有可觀者焉程子曰一命之士苟存心於愛

物於人必有所濟况操一州之幾要者乎德容勉乎哉勿若俗吏
惟讎怨於齊民而竭智力於鞭朴也州之侍御崔公武選陳公欽
之故人也今不知歷何官已投老否德容儻往拜而請焉必有善
言也德容勉乎哉巡撫都憲侯公大叅前兵部亞卿張公欽之同
年友也今不知遷轉否德容為之治屬進謁之際必有善教也德
容勉乎哉孔子曰事其大夫之賢者友其士之仁者此之謂也又
何患善政之不布而窮民之不蘇哉若然則病夫亦與有光矣德
容勉乎哉

簡石齋陳先生

賀 欽

欽往年京師承教誨之勤恩同父母奉別至今忽忽九載企慕之

私無間時刻屢辱惠書教并紀夢說目策讀近思錄諸詩及門下
從遊諸友論學書每拜領如飢之得食渴之得飲欽感佩恩教莫
可云喻第昏昧之質立志弗堅加以壬辰析居以來創購室廬課
治田事不克專意於學是以雖荷教誨屢屢未能少進愧愆之至
推其病源又以不知其要耳何者往時見書冊中先聖賢垂教之
言及親承先生之誨或涵養或省察或致知力行無所不信無所
不悅隨所聞見以用其力特以實非自得不知大要見無一定力
且弗專坐是迄今無少改於其故耳今者屢承開示潛玩久之乃
知其理充塞天地貫徹古今無處不有無時不然事事物物各有
本然之理吾人何勞攘勿忘勿助循其所謂本然者而已然雖見

得大意如此苟非格物致知灼見事事物物本然之妙烏能勉強而循之此知之所以當先也然非敬以涵養此心使其長主於中不馳於外則身且無主雖視不見雖聽不聞至麤至近者且不能酬應之况於究義理精微之極乎此涵養之功又在知之先也是知今日用功之始惟當先事涵養放心不收終難為學此則決疑也林緝熙端默有見誠晚學所當遵行欽又欲求僻靜處或山寺中靜坐以收久放之心第老母年高無他兄弟備養理無可出今春二月攜一二生以就本城奉國僧寺杜門調攝旬日一歸省母於是收心讀書然亦弗能累旬端默但孜孜持以收放心之意則弗敢忘耳前時因循負教罪過千萬至今稍識用功寧敢蹈故

輟以自取絕於大賢君子耶自是以後積累久之幸有所疑所得
績當請教仰惟先生道明教行樂莫大焉欽之不肖再得親炙函
丈不識在何年耳相望萬里不勝馳情謹貢此書不罪僭易幸甚

簡都閩

賀 欽

昨日進拜蒙厚欸承諭教家人紡績推之以及城堡居人甚大惠
也蓋此方之人素不曉此用是困於無衣若上之人教勸之使一
方無一家之不紡績日後人人遂暖衣之願無號寒之苦則大人
恩澤之溥極於久遠人之感惠不但有袴之謠也桑棗之植亦有
久遠之利不三數年便見成效又云欲作射圃於府中以教射藝
亦大好事凡此俱望及時行之邊方之大幸也恐公務繁多或以

此為不急則非吾民之福也用敢瀆告惟高明留意焉

與鄧都閩書

賀 欽

欽之不才荷蒙誤舉母老身病有幸盛意愧負愧負更望執事充此為國荐才之心廣詢博訪不間幽顯苟得其人隨其才德之巨細或上之朝廷或荐之鎮守或用以自輔或委拔衛所以主軍政此忠蓋之大端也或以生之不才有幸盛意而遂沮夫荐賢之心豈可乎哉惟高明勉圖之

與王天申書

賀 欽

令姪誠繡衣公選入遠右書院用功杜誠亦然誠母老疾嗽喘不寧雙目不辨物色思其子不得見日夜憂戚書院生惟歲暮得歸

餘時不得擅出書院門守者弗容故耳杜恂之在官能不思其母也萬一自今而後母氏告終寧不為終天之恨也竊謂相知之深者當速語恂之使及早辭官歸養老母終其天年服闋再起能忠孝兩全也恂之與吾天申為密友而余亦得託交恂之父子間知恂之歸養為美事而不以告是吾人先不自盡朋友之道也是明視恂之墮不孝之域不一引手救之也是謂恂之不能辭官歸養便已私忘母慈也在吾人而可如是乎曾謂恂之之賢聞良友之忠言不惕然悔悟解組趨庭終愧反哺之烏乎因會錦州友言李廷幹父八十有餘病卧弗起余曰朋友當勸廷幹歸終養再仕張解州在座曰子何舍近求遠杜母如是而不勸恂之尚何廷幹之

勸余深然之用有此舉惟天申圖之

祭古墓文

賀欽

維年月日戶科給事中賀欽遣園丁朱紀以隻雞杯酒之奠昭告於前朝古墓主人之靈今歲之夏園丁作廬掘土築墻石棺以見奈何愚夫蔽而不告埋骨別所取棺入城貨人為槽用飼畜產自恨無德化及家衆乃致園丁為此不仁知之後時改過遲暮謹以遺骨復歸故器深埋堅築誌以封土期以久遠更無他虞世俗衰薄殘忍成風石棺飼畜比比皆爾曾念古骨棄何所我亦人耳忍復用茲安得仁人在位行政各使遺骸得歸故藏德薄力微痛惻而已謹遣園丁酌酒謝過不忘者存鑒此誠意尚享

一峯羅先生墓誌銘

賀欽

先生諱倫字應魁改字彝正號一峯其先豫章人唐末徙居吉安永豐湖西代有聞人歷宋尤盛武崗教授開禮公勤王死節以故族屬三百餘灶無臣事於元者祖諱求仁號善耕儒雅個儻樂善好施考諱修大號大山耿介忠信母李氏以宣德辛亥正月十一日生先生時有奇祥甫五歲常隨李入園收果長幼競取獨賜而後授年七歲善耕先生訓於庭不匝月而童蒙諸書咸遍明年學於里師時乏書里師令遍逐諸生投讀諸生未成句讀而先生皆已成誦嘗牧樵則攜書讀之自幼勤學定省之餘未嘗釋卷年十四授徒於鄉以資親養莊重嚴毅師道卓然嘗曰學豈科第而

已哉乃欲捐舉子業父兄不可已而補郡庠弟子員言動不苟勵志聖賢之學朋黨以道學目之郡守張公瑄嘉其學行而惜其貧乏命有司調之先生謝弗受豪右肆侮殊甚先生恬然不之校也是年丁內艱居制嚴甚踰大祥口始沾鹹酸物丙子領鄉薦癸未赴春闈遭回祿呼曰吾生平無毫髮得罪於天今乃至此奈吾親何須臾垣上一老人以杖提而出時殞軀者幾二千人而先生獲免出示招老人竟無所得未幾大山先生訃聞奔喪執禮如初先生雖不以科第為心而大山先生預知必魁天下成化丙戌其言果驗就題論事頃刻萬言指切時弊拳拳以格居務學為說時謂之真狀元為翰林修撰無何會內閣大學士遭喪去官起復之先

生請其私第告以不可者三復俟數日上疏歷陳古今起復之非是且謂如其不然必準富弼故事終喪劉拱故事言事反復數千言一本於天理人心之不容已者名曰扶植綱常事奏疏落職提舉泉州市舶司然士論益榮而緘默之風為之一變終先生之世臺省不復有起復者矣在泉時秋毫無所與惟講學鬻文以自給配梁氏安人卒泉守李宗學遺以棺先生以其求文未償受之明年召還復修撰當道者語人曰某之復官我之力也乃無片言謝先生聞之曰渠非有私於我也乃改南京供職三月以疾辭朝廷不允二年章三上始得歸戊子秋抵家卧疾養心之餘苦禮記註說之繁命門人錄其要以便觀曰庶不失所執守也壬辰疾稍愈

以族屬未化諭之以約束本之以律令於是喪禮修浮圖除盜賊
息民業安十餘年間兼并不作鄉俗為之一美嘗欲仿古置義田
有助以堂食錢者先生弗受且告之曰是錢雖公亦不可費以之
積粟賑民可也或衣之衣行遇乞人死於途輒解以覆之乙未卧
疾厭囂乃於金牛山中結茅東曰靜觀西曰正密居焉四方學者
往來益衆先生於講明性學者納之務舉業者辭焉越二年戊戌
九月二十四日先生疾革怡然而逝無所顧慮者見道明也先生
素清儉自朝服外絲帛之衣未嘗入體歛襲具乃取敝幃以
斂門人方琬輩解衣以襲友人羅峻極貴傑助以棺嗣子迎柩歸
隨而悼祭者數十人四方赴弔者三載不絕先是夏秋間山嶽崩

裂大雨如注烈風折木先生所居山脈忽墜一井其深叵測哲人之喪而天地山川為之一變其生蓋不偶也先生天資剛明清介淡然無欲勵志聖賢涵養純正學貫博約才周經濟忠孝懇懇至老不衰出處進退合乎道理片言隻字有關世教教人本之以誠敬成之以寧靜又以小學進思開發之惓惓不少怠先生於功名富貴真如浮雲之過目惟終日乾乾不自滿足潛修之功垂死不已而踐履益純此靜觀正密之銘所以繼作也先生律己甚嚴而待人甚恕自奉甚薄而賙人甚急其排斥異端以崇正學蓋天性也有識之士以先生之處而委以吾道之緒冀先生之出而望以吾道之行惜乎年不配德未老而歿悲夫梁氏安人卒繼劉氏安

人子男四人梁柱幹樗梁柱先後領鄉薦女三人一適張其二早
世以成化辛丑十二月葬本里都溪塢上源有一峯集行於世愚
忝先生榜進士尊事惟謹先生直弟我不世俗讓愚與先生俱以
戊子謁病歸逾十年而先生訃至又二十五年弘治壬戌之夏其
子梁柱自京師走書古宜請名先生之墓嗚呼我尚何辭哉但以
筆力之綿弱不足發揚盛德自愧銘曰先生之德正大光明先生
之才奇偉汪洋先生之志聖域是藏先生之功扶植綱常嗚呼哲
人日月其光醇哉百世之望

修廣寧左中屯衛學記

江奎

衛治西北有廟學自正統元年巡撫李公濬始也公上疏請建衛

學詔許之於是錦州委都指揮李真創建焉成化己亥指揮白欽增修之乙巳戶部郎中毛君泰飭繪聖賢四配十哲像厥後廢修無常嘉靖庚寅大學士張公璵奏正祀典撤塑像易木主更爵號改為至聖先師千古之非悉革迨今廟學駸廢圯矣己丑巡按李公輔謁廟命亟修之檄僉憲董君世彥議不果董陞任李公亦復命去丙寅巡撫魏公學曾至鎮守王公治道又言之巡按李公淑和來試士僉憲何君榮奉檄議修委指揮周之畢董其事發庫銀四十餘兩市材鳩工計估不敷議增八十餘兩乃構正殿五楹作翼道周圍石欄凡二十餘丈東西廡各五楹戟門一楹櫺星門樓三楹戟門之東曰名宦祠西曰鄉賢祠各五楹明倫堂五楹兩齋

房十楹堂後敬一亭三楹堂左啟聖祠三楹官舍號房成秩於理
先是樞星門近逼居民樹屏一面乃令分守參將前守備錦州趙
君完易民舍基地南北約五丈餘東西倍之始鑿泮池一區甃橋
一座中建石坊外聯石欄又於通衢之東去四十步西去二十步
各建坊東之匾曰道冠古今西之匾曰德配天地壯偉華麗視昔
加備是役也經始於嘉靖丙寅冬訖事於隆慶己巳秋凡用材以
株計則一千有三百石條以尺計則二千有二十甃瓦以片計則
五十萬有三千灰以石計則一千有五十鐵以觔計則四百有十
籩廩以斛計則二百有六夫役出之丁壯車輛出之屯堡而周子
之畢綜理經畫實勞瘁焉然是學之修也而豈徒然哉俾諸生睹

廟學而修業者非六經無所用心非孝弟無所造就也故曰堯舜之道孝弟而已矣賀醫閻先生嘗以白鹿洞規教人而士知學之宗者其亦有聞風而起者乎

醫巫閻先生集序

都御史 李承勳

予昔從伯氏世卿子大崖山中讀書至古之學者而已大崖慨然嘆而問曰今天下有若人乎予未能對復嘆曰白沙陳先生公甫醫問賀先生克恭真其人也吾將焚舉子業從子遊越數載還自白沙稱其緒論以為人心通塞之機生生化化之妙有非見聞所及者必深思而自得之未易言也白沙之學以自得為宗喫緊工夫全在涵養端居靜坐不為私妄間隔至心虛氣靈天理流通大

本立矣喜怒未發而非空萬感交集而不動舍是則滯礙於形器
支離於吐嗶力愈勞而心愈亂不足以語道矣故其詩云吾能握
其機安用窺塵編先生之學亦出陳氏在諫垣時聞為己端默之
旨篤信不疑謝病歸構小齋讀書其中隨事體驗未知其要潛心
玩味杜門不出者十餘年乃見實理充塞無間化機顯行莫非道
體事事物物各具本然實理吾人之學不必求之高遠在主敬以
收放心勿忘勿助循其所謂本然者而已故為臣必盡其忠為子
必盡其孝推之家庭閭里冠婚葬祭服食起居必求本然之理而
力行之久久純熟心跡相應不期信於人而人自信有邊將撲殺
獻績者見先生即吐實曰不忍欺也城中亂卒焚劫不入其坊人

扶先生往諭之衆見之即羅拜而泣曰吾父也遂解散待罪城賴以全非盛德能至是乎嘗並而論之二先生之學均於為己白沙資質高明而虛靜涵養之益為多故其見高妙至其德立道尊體任自然從容和易不事矯飾不善學者見其暮年氣象之可親而不知其早年自治之甚力憚深思而欲徑造自然怠克治而欲妄效和易故多流於放蕩先生性本篤實其學主於躬行循循然自下學始法地之下以固其基法地之廣以聚其業如是而自治如是而誨人如是而始如是而終篤實之積光輝發外傑黠者心服而獻誠叛亂者醉德而革面予昔撫東土訪先生之閭見其子進士士誥文行不忝所生又聞有老門生百戶胡深者亟欲招致匿

不肯見先生之風高矣遠矣今夏士諮輩錄先生言行詩文奏議
共若干卷遺余於戲先生之學本不可以言語文字求今先生往
矣舍言語文字何以見先生之心謹叙而傳之先生諱欽世為定
海人以戊籍隸遼之義州衛登成化丙戌進士任戶科給事中養
疾回隱居醫閭山下克恭其字也遼人無老少貴賤至今稱為醫
問先生云

重刻醫閭先生稿序

陳仁錫

賀先生三十成進士三十一官給諫災異乞罷免其最沉痛之言
曰今所謂修省惟陛下一人耳三十二歸讀書醫閭山疏諫陳白
沙宜居宰輔任經筵懸像靜室率弟子拜之廿載事母薦起不赴

尋丁艱上書陳四事劾內鎮守甚力執政迂之公輒自忖不學無術盡削其草剛毅類羅一峯一峯先生年友也事之亞於白沙教人先小學敦古禮革習俗義州化之寇不敢犯其里見先生且羅拜止殺歲庚午余承匱司業上然大司成馬言有旨本雍坊翰會議孔廟從祀公最無間知其人不讀其書可乎是書得之前屯賀訓導君卿以選貢捍危城率先道義及進香河令勤政凜操撫恤遺黎公賢子孫也乞余序以傳先生生於義州古曰宜州醫閭山居於右余奉使遼東都司即其地今移而之寧遠矣初高皇帝命功臣龍虎上將軍都督馬公雲葉公旺自登萊渡遼招附經營設都司焉東廣寧南錦州西大寧北一面鄰敵耳自徙大寧諸城人

民盡予朶顏此州兩面受敵緣邊最要害云先生亟稱王中丞九
舉創六馬營堡弘治王叅戎銘修建大清堡而大寧大平大康大
安大定堡踰年皆復多者七百少者四百授之堡田耕且守而又
極稱遠當世祠莫如馬葉二公大都開創衛所建立學校報德報
功何可忘也公嘗言洪永間遠兵八分農種二分守城以八養二
今盡反之銀糴中鹽尚苦不足亟反二八農守之數使戰兵雖少
而精不求給於農種之外邊防無虞大費亦省至哉言也予憇寧
遠屯計工而分粒土甚沃美公言猶信公以銀的教射語人曰進
不為朝廷用退不為鄉里益吾恥之雖老病不敢不勉又稱懷柔
伯念久雨治水口既僞工設酒筵所部將士有禮節其守臺貼臺

不習於射官軍半私鬪敵至如入無人而爭買漢首以充級則齒
牙憤裂各記姓名俟天道報復又念此方之人不習蠶織於是教
家人紡績以及城堡公於貼臺守臺勸耕勸績用心如此躬行君
子不虛耳嗟嗟中山王垂老薊門經營九載而從海之役屬之二
將薊遠可兼中山兼之矣高皇帝必使中山兼之矣意者山遠海
闊關外金城遠海相注灌遙呼山東舒叻近控薊門張翼遠薊各
自為而全體相首尾耶意者大寧一失兩受敵兩受牽左枝右梧
情形迫遠昔離之乃合今合之乃離耳苟求其故宜閱此書苟求
其故而不得宜閱此書揣公之心若曰為人臣不保疆土保父母
保鄉里以貽君父之憂豈人也哉茲余評閱意也

清

祭北鎮醫巫閭山文

高宗

惟

神位鎮冀方功齊桓獄緬肇封之典望著虞廷參列宿之精詳鍾
尾野永作嚴闕之障勢拱幽燕長資靜鎮之庥基凝東北溯昔三
申盟薦曾舒仰止於明禋越茲四度經臨復展升馨于邃宇
神其右饗庶克惟馨

不改亭碑銘

于成龍

保定張氏園井亭者為前明光祿寺少卿張公建也當崇禎十七
年三月流賊猝陷京師保定嬰城拒賊有死事之烈首其事者公

也世祖章皇帝時有科臣疏聞於上從郡人請祀於學既而常郡
丞申請表揚闔郡之抗節死難者復同祀於忠烈祠茲則其死忠
之地也方保定守於京師之既亡也賊攻城羣呼公舊官名張吏
部公罵賊城陷大書壁曰大明光祿寺卿張羅彥義不受辱縊死
井亭婦女俱投井死闔門殉者二十有三人所最奇者公配宜人
趙氏先從公自縊不死又入井三日不沉家人投綆出之賊恨公
堅守既大索城中復於城門嚴詰得一張姓者賞五十金宜人方
在憂懼中忽而假寐夢公曰孫出矣解已朝衣覆宜人宜人覺語
家人家人共以筐舁宜人用被蒙筐比至城門賊蟻聚無一人問
去城四十里遇老嫗抱公孫至即今之秉曜也彼時方周歲秉曜

成立家已落園已他質并亭已圯迄今三十餘年不為張氏有也
園并偏近余身舍余為捐俸贖園構亭祀之亭落成取易并卦改
邑不改并之義題曰不改亭張生請紀其事勒諸石竊謂古今有
大戒無所逃於天地之間者節義也節義不明人極不立人極不
立則天地之心無所寄而帝王之教無所施然每讀史至鼎革之
際士大夫為禍福所動苟一時之生而貽萬世之譏者多矣仗節
死義代不多人如公者豈非有明一代之臣哉嗟乎公之忠烈已
登明史逸事盡於墓碑首事拒賊詳於保定紀事不具述茲特識
其建亭始末如此公伯兄癸未科進士羅俊罵賊死城頭六弟武
進士羅輔死戰四弟文學羅善公子文學晉從子文學伸死園外

井其死此井者則公妾宋錢子婦師暨公一幼女也其闔門婦女或縗死或井死皆得祀於亭倡義者公例得從公也公諱羅彥字仲美號二酉崇禎戊辰科進士銘曰

昊天降割殄有明鷓鴣奮志獬豸擗掩遏赤鷓敵陽精宮殿流血傾神京撓脰稽顙多簪纓有勇光祿張少卿京師已陷奮志生攀孤環甲嬰孤城一木難支六日傾從容就義眦裂經寫頰忠字耀日星二十三人同沉冥用酬養士彰地靈易水湯湯郎山青千年萬年仰此亭

題蔣毓英重刻漢紀序

漕運總督
謚溫勤

郎廷極

蘿村蔣氏昆弟刻荀袁二紀成商邱宋冢宰讀而悅之謂其校勘

詳慎彫刻精工視黃氏所鐫本為良蓋是書竣於康熙丙子距黃氏已百有五十年而黃氏版已不可多得則是書之刻又烏可已哉余嘗慨古今作者之有幸有不幸也班固繼馬遷之後而為記傳而後世作史者因以為例要之前此固未嘗有也夫史非徒記事而已將以明一王之制政治之得失禮教之盛衰鮮不於是乎取徵使後之讀者瞭然如指諸掌則固不得取紀傳而忽編年也而後世乃尊奉班范之書而於是書則目之為逸史即藏書之家不無皮本不過藉以為參考之備亦聽諸可有可無之數焉已矣嗟乎古來著述家論議卓卓足以徵往古而信來茲者不知凡幾如謝承司馬彪張璠諸儒之書皆日就散佚寧獨荀袁二紀乎哉

蓋書之傳不傳亦存乎後人之好尚焉耳然則編年之法遂不可
行於後世乎曰是不然中古之事莫繁於東遷以後其間會盟征
伐聘問燕享無日無之蓋有史策所不勝書者然而夫子作春秋
寓褒貶於筆削而二百四十二年之中邪正曲直粲然眉列則春
秋者固千古編年之權輿也宋時涑水紫陽二公遂祖述為編年
法而資治綱目二書復行於後是亦編年之遺意云爾孰謂其不
可行哉班氏范氏專事詳贍意在表章人物然其文冗蔓繁委使
讀者尋覽而不得其由則二子之文其亦猶行古之道歟故予謂
讀史者欲博考事蹟則當以紀傳為歸欲統會全旨則當以編年
為正二者如經緯之相須其不可偏廢明矣蔣氏版歸於年中丞

家予復得之年氏乃為言以著於簡端

蔣刻南唐書序

潛運總督
謚溫勤 郎廷極

馬氏南唐書三十卷陸氏南唐書十八卷元明以來舊版寔廢卒
無善本近者梅中蔣氏刻之於吳門都為一集俾讀者參觀而得
之庶幾一朝之事蹟粲然可考誠學古之盛心也今其版藏於余
家乃為之序印而傳之予惟五代之季昏亂相尋先王典章文物
之盛蕩然無可復覩李氏為唐室裔孫崛起戎行據有江表即位
之後建宗廟置社稷簡賢任能百度俱舉雖僻處一方然創建之
規模猶彬彬可觀也以故學士大夫多樂傳其事叢談野史無慮
數十種惜乎今皆不可復見矣馬之祖元康舊有成稿因而撰次

之故其見聞為備陸於三主皆為本紀微示尊崇以明正統所屬
趙世廷稱其作文有法洵不虛也要之二家作書之意各有不同
惟是本朱子綱目之旨而參以鐵崖正統之辨則陸書為近正矣
抑予又嘗覽錢塘吳太史志伊十國春秋其採輯南唐事最為詳
博有二書中所未及者其為列傳多至一百九十五篇證之二書
所載則僅得吳氏之半於此服其搜覽之廣而古人所傳者為簡
略也蓋吳氏所輯薈萃衆書而成故其說獨詳然其中宏綱巨目
未嘗不以此二書為準的讀者融會二家而更參以吳氏之說則
庶乎得其全已

怡賢親王廟碑記

年希堯

雍正八年夏六月內務府總管差督准宿權稅臣希堯請就所居之房山縣建立怡賢親王廟以修歲時祠祀敕曰可竊以詩人之美衛武公也曰有斐君子終不可諼兮而傳之推原其說以為君子賢賢親親小人樂樂而利利蓋其所施者遠則其所慕者深是以聖人通人情而定禮曰有功德於民則祀之誠以知天下有難已之思無忘之誼也我怡賢親王以介弟之貴獲奉元良翊聖戴天勤民恭己八年之間天子方運堯舜之治而王即宏皋夔之業天子方隆手足之寄而王即效心膂之忠天子方除莠刷瘡以播上蟠下際南曜東漸之澤而王即手奉風霆雨露以整齊而鼓舞之故其德業之盛如日月之得乎天而益明江河之振乎地而益

沛春風之得乎時而益偃是雖子淵之善頌有不能形容其際會
焉而王金玉其度彌慎彌恭嘉謨忠告善必歸君是以道濟天下
而不知功在社稷而弗有至於庶績百度靡不裁成中則汎應而
曲當焉未幾王以疾薨於位天子震悼弗寧凡所以致哀榮於王
者無所不備而其讜言隱德造膝陳情於從容密勿之間者又悉
以敷告中外天下臣民奔走謳思若將弗及朝廷用矜其志許祭
許祠而後天下之人得以尸而祝之是豈王之私義感人哉王之
忠義足以動物也故享於大烝禋於太室酬庸之典亦云備矣而
非以慰四方尚德之情也希堯從大夫之後沐浴王之德澤勤篤
王之訓誨出於凡百有位者奚啻萬萬又何敢自遺其鄉邑而徒

殷邦人以袞衣繡裳之思也哉用是庀材於林伐石於山既構既
塗越明年而廟成而王之靈如水由地中宜亦無往不在也將使
祝釐介景者恒於是祈年禱雨者恒於是王之陰佑則固然已然
非所以奉而祠之之微願也夫希堯受生成於王者至矣一念不
忘行年六十惟有矢此心以奉君國以勤職業以淑其昆弟子孫
歌之詠之至於沒齒若徒云俎豆烝嘗而已是豈王之所降鑒者
乎書曰黍稷非馨明德惟馨嗚呼其敬之哉

陸宣公集序

年羹堯

有唐陸敬輿先生制誥奏議之文義烈感人心文章鏘金石自宋
臣蘇軾范祖禹等元祐進呈以來人知尊奉版行不絕迄於今日

已如日月經天江河行地豈猶有待於表章而宣布之者顧向所
流傳率多訛字余自受讀以來留心購校迄無善本夫先生之文
本非有子雲之艱深退之之佶屈正以其周盡事情人人可曉故
足以興起來學感發性情如今諸刊本往往於敷陳剴切之處讀
者方且揮涕激昂而一字之誤喉吻輒為之躡嚅或指畫詳盡之
際讀者不勝開心領會而片言之偽神志亦為之晦昧余以此為
恨二十年於茲今於退食之暇與二三文士校讐而商推焉訂訛
析疑雖不敢謂盡得作者之真較諸舊本庶幾十正七八爰授梓
人以公諸世譬猶仰日月者去其浮雲之翳而瞻矚益明行江河
者屏去沙礫之游而溯游愈便先生之文固不待此為輕重而於

讀先生之文者未必無小助云康熙六十一年壬寅

雙塔崇興寺修造粧塑碑記

知事張文治進士

嘗考遠舊志廣寧有大寺二其一為普慈寺在城東南隅一則在城東北隅即雙塔崇興寺是也寺創於唐貞觀十八年太宗征高麗旋師命尉遲敬德監修並建浮屠二座歷元皇慶明嘉靖間屢經修葺其規制宏麗故當時號曰雙塔崇興寺居鍾秀郡八景之一蓋一方形勝地也我朝定鼎燕京以關東為發祥重地畫郡邑置守令而廣寧稱縣治焉予以康熙己卯秋來蒞斯土甫入境流覽山川其氣色鬱鬱葱葱然方振興伊始城以內瓦礫荆榛雖觸目橫塞然諸古蹟之廢墜者其遺址頽基尚可過而問之殘碑斷

碣尚得捫而讀之將昔特蔚為物華余固逆億其次第修舉時人稀力絀未得能驟期諸旦晚間也居無何偶一遊崇興寺至則見殿舍丘墟壁垣坍塌所存者惟兩浮屠屹然未仆耳適有寺僧導行至後陟台塔有新佛殿櫺扉扃閉及啟視則空其中未貌也僧為余言寺之廢也久矣先寺僧真空成文發心募緣得銀五百餘金於順治七年四月內庀材起工築臺基廣袤二十丈有奇修建正殿五間禪室三間挾小制度遠不及昔者奚啻什伯然已肯力告竭以故粧塑塗堊諸功績迄今廿餘年未果比來僧等篤懇城守尉鄭公倡募資材用就厥緒鄭公遊此許捐金復引僧徧丐十方共襄此舉業計有轍積矣言已越歲餘鄭公忽造訪曰雙塔寺已

粧塑畢塗堊已竣余不敏董其事蓋往視諸余因偕往但見金碧輝煌丹青絢爛殿宇為之一新中塑佛像三尊阿難迦葉香花菩薩及韋馱天王無不畢具其偉麗推與殿稱鄭公乃囑余為文以記之余竊維朝廷設官原為地方也廣寧地方經殘燬之餘其應行修舉者不一而足官斯土者擇其要者而圖之猶慮力不暇給矧以浮屠之末顧黽勉從事欲以誇示來茲乎而不知天下事有實無益而治之者治之者之過也有似無益而實有益而治之者治之者之功也茲寺之由來也遠其闕諸形勝也重令此者廣邑之亟務不修舉而培形勝以為風氣之所由隆亦非可謂宜後而不切於時務者之為也不然彼唐之太宗創設歷代之鉅公奉修

之記載之者珉勒俱存豈皆不可為訓耶吁是可記也夫鄭公諱
有時原遼之鐵嶺人現任本城守尉章京募緣僧其宗體學慧元
云

廣寧縣義學記

知事項 蕙

余以庚申正月蒞廣寧再閱月規治東隙地將誅茅為舍招邑子
弟延師教之邑之父老似有疑而議者余悉其狀集諸公廁而問
之曰吾儕小人誠不知治要竊見號神君者雖多殊績大抵不過
急所當急緩所當緩而已哉我公下車勵精圖治以修息民力為
心乃聞割清俸誅茅為舍以教邑子弟是近迂非所望於我公也
余曰必何務之為急曰教民稼穡力作貿易使勿訟興而耗財余

曰若輩何知急其所緩正以急其所急也試畧言之吏治壞則民風敝而民風之敝不敝於椎魯鄙樸之氓而敝於聰明才智之士椎魯鄙樸者或農或工或商即上之人不之督迫亦從事焉惟聰明才智者教之農或越其畔教之工或躍其冶教之商或折其本彼之聰明才智心有弗屑也其父兄初或溺而縱之繼雖不欲縱業已成習放蕩不可收拾呼朋引類忘三餐所自來視六博為正業招尤啟釁蕩產傾家其為害一也又煽惑彼椎魯鄙樸者為其所為相率而從惡以致夫不之督迫而業農業工業商者竟日加督迫而不農不工不商矣游惰滿街淫酗成俗究厥病源實為戎首其為害二也况又不但不農而為之辭曰地瘠不但不工而為

之辭曰力殫不但不商而為之辭曰貧無母何子焉久則地不糞
真成瘠矣力不用坐成殫矣家無以為生貧果徹骨矣夫乃緣鋤
口之艱難致輸公之濡滯為乾餼之過失起雀鼠之忿爭其為害
三也嗟乎幸而生聰明才智之子弟是人所禱祀而求者而其為
害至此無他不學之過亦不使之學之過也使之學則彼方澤身
禮義之林奮志勲名之路翹翹自命曰吾士也向彼其煽惑者榮
其若是亦欲從為士而不可得故歸而各業其業從此四民不見
異而遷家給人足比戶可封矣余之欲為舍以教邑子弟者職是
故也在所緩耶急耶諸父老乃悅欲子來其事余不可爰興工於
三月十二日乙丑落成於三十日己未舍三楹苫以蘆垣以甃西

依縣治東面龍山弁其門曰義學而典史邢君式巡檢秦君涵亦與有力焉異日者踵事增華尤余所望也因筆其經營之始事而勒諸石

重建廣寧學碑記

訓導 綱 興 舉人

且夫任事之鉅者成事必難非人事故沮之天心實不欲以難之功予人以易就也凡事皆是重建廣寧文廟之工亦然何言之廣屯界分存者四一地隘民貧捐募有限此界小之難學額三名紳衿無多雖有例員不專統屬此士少之難舊基為鎮東堂之右周圍百餘丈地址極寬規則實狹寥廓零星未符禮度欲求相稱增改必多此工大之難殿堂既闕梁棟必高土木工多費用尤倍此

用繁之難修工必賴董事起意必先請十數位而肯來前者六君
田君景藍次年物故王君亨揚君大鵬張君明焦君上達劉君錫
福趨事赴功日不暇給然教讀在外者有時應試赴都者有時此
董事不專之難修工必資協助邑侯同年強公上林未幾卸事同
年興公太旋復丁艱分府萬公濟同年周公良卿均屬兼署徵公
良兩閱月即調承德此協助不久之難猶曰專司者難自諉也乃
網於工興之次年鄉場請認乙未丙申歲科赴郡動延春夏未免
奪時此專辦間斷之難猶曰公項者可公用也各工必設火食此
因費繁項少督工皆自備飲饌夫匠少額外犒勞記寫帳目催取
捐貲非借力鋪商即使令乎學役此樽節學費之難廣寧他廟皆

甲鄰邑獨此久廢以廟屬於官邑侯不修人莫敢擅今官來官去
三載五更足疲舌敝僅屬廣文此無勢權之難廣學在昔官稱有
人學署聿修經閣新建先吳後邊兩相輝映顧卑陋狹隘未嘗改
更茲獨不揣力小謀大此不自量之難意者廣交多助耶文武同
官契誼若素彼雖垂青我自守拙學校來往讀書正人聲氣應求
忠厚長者澹泊相安奔競弗尚此無邪許之難勸捐伊始言念費
繁欲多捐銀援議叙例劉唱諸君均捐銀三百六十兩在諸君義
舉原無仰邀議叙之心而司事若網詎可前言不踐先事稟修兩
次報竣查工者田翁學憲兩來視學部尹憲飭委春太守親來驗
收邑侯五公各有力焉此申請頻仍之難將次事竣瓦工王存忽

有言曰工雖告成恐不能久何為其然當觀已往存家業匠已百餘年未聞修工陡興自公脫公陞去誰復追踪余聞愀然用告董事須念存言歲修留貲以永厥傳此善後宜謀之難有此十數難卒能三楹增五楹改三破壞重修狹小新建新建殿廡二十九間重修十二間學署十七間學宅十一間繚垣腰墻一百五十餘丈捐銀至六七千兩之多時歷三年功完一律何易易也蓋有天焉此雖董事諸君勸諭之誠實由我廣民風之厚向道慕義人心既同先難後獲天心斯鑒是年李君柏成進士張君震魁於鄉王生治成門生銑考取選拔者二人可見地靈者人傑之驗風厚者神鑒所憑人之傑也必代生佳紳衿神之憑也亦時來賢官長此後

人文蔚起倫紀修明念吾輩成事之難務使廟貌常新歷百年如
一日者猶厚望於後之紳衿官長不憚其難而永厥成焉是為記

重建廣寧魁星樓碑記

邑人陸鴻遵字翊周舉人

從來文昌不擇地而騰輝盛舉必待人而集事考之天官書北斗
七星有方形而四珠者名斗魁上有文昌六星文教昌明則文昌
氣似珠斗魁亦然是皆有關文運之盛衰與科名之隆替者故通
都郡邑莫不建閣以奉其神良有以也吾邑舊有大魁閣歸然於
東南隅城上國朝乾隆年間重為修葺迄今已歷百年風蝕雨淋
頽然傾圮曩官斯土者率皆築室道謀績用弗成然而閭山之靈
秀秘而將開遠海之菁華鬱而必發適逢我邑侯談公來宰是邑

勵精圖治事不憚煩公餘之暇課試生童訪知廣屬近年掇巍科
登顯第者鮮有其人毋乃斯樓未及重修之所致歟爰同尉帥崇
公籌商興築之策設法勸捐民不驚而貲亦輻輳焉興工之日掘
地得條石數百丈取土得青灰數萬斤益喜力不勞而工易成也
於以見天人默應之機感而遂通之理莫之或爽工成將勒貞珉
命予作記予思良有司固精誠格天爾多士宜潛修飾己將見人
文鵲起科第蟬聯以無負我雲公之盛情也副我雲公之厚望此
則予之所甚拳拳也是為記

問山海雲觀重修碑記

經筵日講起居注官

錫

鈞字聘之

海雲觀為元代雲巖故址國初龍戰寺燬於兵乾隆間有王鍊師

名合悲者住錫於此經營草昧建為叢林改易今名香火復盛光
緒乙酉余紆道還京邀劉子東葛徧窮閭山之勝詢諸居人則觀
中土木之役將次告竣琳宮紺宇璀璨一新神像莊嚴規制宏肅
丹房靜室經堂客舍內外有截繁乎得所皆同虛鍊師戴君宗連
集衆道侶所重葺也觀界閭陽鍾秀之間醫閭之勢南蟠而北折
山靈競秀攜全力以與霄漢相接峭壁危巖高插天半長山大谷
左右周環而觀位峙中峯得負陰抱陽之美洞門北闢山澤氣通
甘井清泉隨處涌現非惟地靈亦闢人巧時值五月幾望長夏苦
旱火織當空比入山則氣候冷然若不知炎暑之在體緣蘿拾徑
藥草皆馨山虛磬鳴巖花微笑遙睇仙山樓閣挂百丈石壁上空

青劃斷經諷徐聞正如武陵魚人苦無問津之路泊乎山陰漸轉
雲籟生林古徑蒼厓苔翠欲滴得門而入福地洞天矣憑軒四望
目極全遼海水天雲碧如螺點而襄平巒古旅順諸山及海外隍
欽谷島軒豁呈露結七百里之翠屏森列几案大園以內川原繡
錯封堦萬家俯視衆生不敢存人間之畛域入夜與劉子登斗台
瞰絕壁月明人靜萬籟俱寂烏鵲聞履聲起翔集崖樹巔下視僅
見其背一時清興浩發道士引余手南指謂光而動者海稜而靜
者山明暗幻化一白無際者其雲也戴君為言茲觀初造之難與
重修之不易屬余為文以示來許聿考中原嶽鎮皆天地之奧區
非得方外人居之則樵牧榛蕪山靈減色有居者矣而棟宇之狹

蓋丹青未煥亦不足以壯名山二者兼矣而物無百年不做之壽
非得道力貞固發願虔忍足以取信於衆者繼長增高則勝境流
傳亦不能與天地同其無盡雲巖之勝志乘所稱而緇流散遷蕪
廢四朝之久王鍊師得而闢之可謂難矣無慮在遠代為都會招
提上下鐘磬相聞今則讓皇之宮道隱之谷皆落日荒煙不可復
識求其滄桑片瓦故老無能道者戴君遜世空山慨然紹初祖之
元微竭精誠於再造一念仁感法侶從風豈物之廢興亦有數與
抑盛業之成待人為也大乘之教凌夷式微戴君乃能挾南華道
德之精不忍自私以教於衆無為自得豈曰非賢世人咫尺見反於
其禱而立應嘖嘖稱羨夫山川之氣與天地通誠至格天有感斯

應至人之常曷足異乎今茲曳朝衫受塵鞅每讀史漢輒慕赤松
黃石之風庶幾一遇方今中外多事聖主宵衣越事雖平隱憂仍
未艾也故山松竹何時克踐初盟青山笑人猿鶴騰怨抽足紅塵
正非易事求如劉子之出而看山入而讀書白雲在霄舒卷自如
且不可得而况逍遙塵壒外哉征途西上書此寄志屬劉子校定
上諸石且結後緣觀修於八年八月訖工於十一年九月凡有事
於此者條其名貲碑陰

縣知事李景祥德政記

邑人 蕭雨春
孝廉

凡政之最足感人者其惟脫民於兵燹之危而登諸衽席之安乎
然當處危之日朝不保夕方慮禍之不暇即幸而得安方慶慰之

不暇其何以脫此危與所以得致此安者未遑計及焉及事後追思則積思而生感積感而思愈不能忘甚矣得轉危而為安者非我李邑侯之力不至此而謂能忘之乎邑中士人爰欲掇其政而記之以文又恐未能道其一二諸父老走相告曰我邑侯之功德豈因危而始見亦豈待文而後顯哉與其文字之鋪揚何如實陳其政績俾吾邑之民共覩之而共知之乎憶我李邑侯自丁酉蒞任以來六載於茲課文勸士鋤暴安良表烈婦以勵風俗修溝道以利行人繕城垣以防寇盜平時愛民之政不勝枚舉雖漢之召父杜母何多讓焉庚子夏拳匪肇釁禍延我省敵人藉口興兵沿海口岸蹂躪日甚奉省兵力素單值此強鄰壓境有不聞風而逸

乎馬賊乘間蠢擾擄掠焚屠四境騷然鄉中莫不避難入城斯時也謠言紛起一日數驚吾邑危如累卵而我李邑侯誓守此城晝夜巡緝艱苦備嘗募勇添兵捍防日密民心恃此無恐焉吾邑之賴以獲安者此其一也辛丑春有過境洋隊數百名突如其來見防兵嚴密疑我備戰立時分佈礮車意欲為先發制人之計我李邑侯聞之即帶諸譯冒險出城諭以我軍為防盜而設朝廷既開和議何得無端起釁洋員遂釋疑入城秋毫無犯翌日即行藉非臨變不驚應機有略其危險幾不堪設想矣吾邑之賴以獲安者此其二也夏五月突有賊匪百餘人來城民心惶惑我李邑侯即出而論以禍福因撫降之後數日旋有巨盜趙壁率夥匪千餘人

乘夜攻城我李邑侯會同城守尉廣帥與駐防隊督飭捕兵練勇分守各門協力防堵布置既定即自登南門以當敵鋒督隊齊開槍礮與賊對仗轟擊多時斃悍賊十餘名賊見銳不可當始紛紛遠竄茲二役也事出倉猝更形危急一撫一勦各得其方吾邑之賴以獲安者此其三也冬十二月小黑山賊首范廣全夥同五大哨餘黨潛至離城里許意圖窺伺蓋探知巡捕下鄉勦賊防或疎也孰意我李邑侯預調近處鄉團入城守陴得信之下即飭捕兵練勇出城迎擊並移知巡捕隊回兵兜勦斃賊數名追擊出境自此之後盜風因而漸息小民始得耕種矣吾邑之賴以獲安者此其四也由此觀之安則慈愛以養民危則果毅以擊賊吾邑雖垂

於危卒能獲安語曰仁者必有勇我李邑侯有焉李邑侯景祥字書雲乙未進士浙江寧波府鄞縣人也紳高等感同再造歷叙其事以誌不忘勒諸貞珉以垂不朽云爾是為記

創建閭陽驛文社碑

邑人

孟憲彭

字海秋
恩貢生

從來學校為育才之地文章為華國之資故三代以降天子曰辟雍諸侯曰頽宮下至黨庠術序莫不有學是以治隆於上俗美於下當時人才之盛稱彬彬焉粵稽閭陽驛在漢為無慮縣遠為奉陵縣金改閭陽縣元明以來代有廢興洎乎國初改縣為驛而學校之規遂無可考光緒丁酉諸同人意欲創建文社丕振斯文至詢諸闔鎮紳士僉有同心於是遂推本界牛叢章京斌公超校政

楊公春元董其成而供億之費膏火之資皆取給於首事之數人
雖經營尚待於將來而規畫固已畧備矣越歲戊戌路記音公德
春首先捐廉以襄盛舉諸同人又廣募諸紳耆鉅資大集爰購文
社一區正房五楹門房五楹東廡三楹以為會文課士之所吾知
諸生之遊斯社者益當明體用以端學術崇敬愛以重人倫非第
以掇巍科膺華牒為足有光斯舉也韓子曰莫為之前雖美而不
彰莫為之後雖盛而不傳斯役也始之者同人繼之者斌公楊公
成之者音公上以贊朝廷作人之化下以繼聖賢立教之心胥以
是有重賴焉爰以事之始訖勒之於石

旌表節孝巴慶餘之妻朱安人之碑文誌畧

李維世

字棟臣
進士

蓋聞義守共姜詠柏舟而自誓心暨烈女託丹水以無移此固芳
徽足式允推巾幗完人彤管揚麻堪作閨門懿範者矣而猶有恩
義兩全孝慈兼盡無虧婦道不愧母儀者使聽其湮沒令聞不彰
何以表萬古之清風勵千秋之峻節也節孝婦朱太安人廣邑亮
馬山屯附貢生兆舉公孫女紀公女也生於道光丁酉年十九適
閭陽驛鑲黃旗人已慶餘踰年夫忽夭殂呼天搶地痛不欲生惟
念翁姑俱年臻耆老供養無人而翁旋患痰火症侍疾六年翁竟
棄養不意姑復痰痿呻吟床褥五年棄養此十一年中飲食湯藥
必躬親操不假他人之手朝夕侍奉終無倦容且侍姑尤篤見者
疑為母女若不知為婆媳者鄉里稱孝焉守節之明年以堂伯之

子榮陞為嗣年甫九齡教養周至擇師就傅恒以讀書立身相勗
試未售二十五歲充馬甲又五年補領催保舉五品委官光緒十
五年為母稟請旌表奉旨允准建坊入節孝祠二十二年誥封安
人二十七年子病故有孫四人長雨田次森田三良田四芳田惟
長孫雨田三歲失恃且幼多疾病八歲患傷寒呼號十八晝夜安
人忘寢廢餐未嘗稍離因誤服醫葯兩足不仁病痿三人安人調
藥餒食洗滌穢溺心力俱瘁毫不憚煩十三歲畧能行步出就外
傳朝而入學夕而歸家安人必倚門遙望所有甘旨之味不肯沾
唇皆留以哺孫寒煖飽饑時時垂問雨田屢試未第安人嘗曰爾
讀書即不能取科第但能稍明義理居心處事不悖詩書遺訓余

願足矣二十九年家境漸落諸孫分爨即依長孫以度餘年近因
餬口維艱在外教讀每當歸省安人必懇切慰問夜談恒至忘眠
惟是孫年近四旬愛憐猶似幼穉雖劉氏之於李密不是過也於
今年五月棄養享壽七旬有五統計生平送死養生敬老慈幼數
十年辛苦備嘗矣爰刊石以紀美俾遺範之常存於戲志貞金石
潛德無不發之光命錫絲綸高行無不傳之隱從此松筠勁節曠
代猶新冰雪清標永垂不朽也已

貢生李公及配妣封恭人王氏合葬墓表文

訓導李

培
字滋園
優貢生

公諱翹林字秀岩廣寧屬小黑山廂白旗人世居屬邑東北司家
屯曾祖考諱我祖考諱常爵九品銜誥贈中憲大夫考諱國鑑誥

贈朝議大夫皆持家勤儉存心忠厚士林咸親其善行焉曾祖妣
于馮祖妣陳潘妣馮王均以溫淑慎聞同胞兄弟二公其長也幼
慧而有志自童年入塾讀書每以揚名顯親為念及弱冠更肄
力於帖括日習舉子業因科第情切為應順天鄉試計遂於咸豐
四年納粟大學為貢生旋以一志攻苦心氣中傷學雖日增疾亦
漸劇次年六月卒於家公生道光七年春秋十有九事親孝戚黨
無間言友于之愛尤摯其平日之篤天倫重名教於此可見公配
王氏于歸未及週年適公棄世時二十有二因無所出以夫弟長
子恩厚為嗣飲食教訓視如親生三十年茹苦含辛事翁姑以孝
撫嗣子以慈於光緒十年蒙盛京軍督部堂慶裕奏請旌表節孝

奉旨建坊人咸謂綸音下逮允堪光門闕而勵世風而不知實公之型家有道得以致榮顯也後十一年乙未冬氏卒遂諏吉與公合葬公因胞弟耀林得貤贈朝議大夫配王氏得貤封恭人嗣子恩厚運同銜候補筆帖式公生平嘉言懿行筆難罄述爰就事之顯者畧贅數語以誌不忘云

陸軍上校關文波墓誌

邑人

孟憲曾

字省三
附生

粵以己未之年建丑之月將星隕墜噩耗驚傳弔英魂兮何處返忠骨於他鄉世無宋玉奇才難擬招魂之賦人想羊公遺愛願留墮淚之碑如問陽故團長關翰章者隸籍滿洲不屑食太平之餉側身行伍常思立異域之功值勝朝之末葉遭土匪之猖狂誅鋤

草莽捍衛梓鄉叱咤則賊鋒遠遁喑鳴則匪跡潛消初辦鄉團父
老則同聲額慶繼充管帶督軍更破格超升慷慨從戎無須門徑
勳勞卓著奚事階梯禦侮邊陲追剿蒙匪入冰天雪窖之場身先
士卒越益海羗胡之境手刃賊酋當塞北凱旋之日正湖南倡亂
之時方論功而行賞忽奉命而出征枕戈待旦方期揚祖述之鞭
拔劍登壇竊願立伏波之柱壯志激昂先聲赫濯孤軍坐鎮中原
勁旅馳名全國效運甓之勞英風凜冽比輕裘之雅號令森嚴孰
知肘腋變生遽折擎天之柱蝎蛇毒螫空悲墮地之星穎考叔之
射傷千秋疑案張桓侯之遇害萬古酸心哭忠魂兮岳王墓表弔
毅骨兮于相祠高英靈不泯雲中之鐵馬疑來毅魄常存風裏之

靈旗自閃底事出師未捷難禁淚灑黃泉應知大樹飄零業已名
垂青史馬革裹尸之願已償虎頭食肉之相無憾原稽生平畧述
梗概書之竹帛用表芳名勒之碑銘永垂遺範云爾

李春園先生墓表

民國三年

世

榮

字仁輔
翰林

昔漢明帝問東平王處家何等最樂王言為善最樂時稱其言甚
大副是要腹顧後之論王者但曰好禮至所為何善史乘不載豈
書闕有間抑言易而行之難歟乃今隱君子中有實行其言者曰
春園先生先生李姓諱耀林奉天廣寧人先世隸漢軍鑲白旗祖
常爵贈中憲大夫考國鑑贈朝議大夫世德相承朝議公生先生
及秀岩公諱翹林先生其次也生三歲妣馮見背受繼妣王撫育

八歲隨兄就傅秀岩公以攻苦致疾歿先生奉庭訓不溺志帖括
改習清書考選筆帖式補盛京將軍署外郎旋辭職入貲為刑部
主事卒不赴官方是時先生年未強仕其難進易退若此然先生
雖家居心未嘗忘世故饒於資遇善舉恒孳孳不倦自奉儉薄至
義所當為推解無吝色光緒丙子旱煮粥活鄉人甚衆丙午後皖
蘇湘鄂連歲災宣統辛亥盤山水患並慨輸賑濟成鄙貧病及無
力婚嫁喪葬者仰周恤焉方外道路窮無告叩門者罔弗應一時
名流鉅公爭相結納下逮耕氓負販無遠近聞李春園先生風者
皆興起奮發先生猶以博施濟衆繼述未克其量為憾會清季變
法令下念強國首重養士輸學田千五十畝入廣寧兵鎮安司家

屯者先生生長之鄉復施校舍三十楹提倡新學嘉惠桑梓登諸
奏牘則尤彰明顯著者也晚近世風媮薄士大夫競尚榮利居室
綽裕則侈游燕輿服甚者乘時射利操奇計贏厚封殖為守財虜
窮戚友冀勺餘潤而不可得以視先生之義心遠度神潛道豐其
天壤相去為何如哉先生惟孝友以兄早世事孀嫂王尤謹數十
年如一日精陰陽學庚子拳變前一載遷入城舉室獲安人以此
服先生智以壬子十二月二十一日無疾終年七十娶陳溫恭淑
慎先先生三歲卒合葬於司家之原禮也子二長恩厚候補筆帖
式繼兄秀岩公為嗣次恩溥直隸候補知州女一適錦州闕常裕
孫書春學習員外郎女孫蘭清既葬恩溥以狀來乞為外碑義不

容辭為述其崖畧如右云

中安鎮學校學田記

邑人李維楨子棟進士

有清光緒三十一年國家變法圖強詔停科場改設學校北鎮縣知事熊明府既奉省令爰照會耆紳董理校務以籌議經始中安鎮學務則家大人誠齋公董其事而王君裕如為之副於時城關四鄉皆苦無的款以故多方謀畫尚渺端倪惟中安鎮有三屯公領牧場一段計一千九百六十六畝五分此牧場者乃乾隆中由中安鎮湯屯趙屯住民十五戶公舉宋廷吉倡首報領納課以備三屯牧畜取土之用者也家大人既任校董謀於眾以永安寺後院有房五楹作校舍講堂並議將牧場開墾招租用充學款三屯

協議皆贊可乃具其狀縣署請主案共策進行突有奸民馮某懼
牧場改歸學校不克遂其侵牟之願私作偽契竟以牧場一部售
之教民三屯控之縣涉訟逾年會楊海琴知縣事異懦不敢為公
判甚且斥校董為多事而反施推辱由是校務停滯而三屯公領
之牧場且將任奸民攫奪以去莘莘學子悲憤同深屬徐東海督
遠維楨以同知需次吉省電籲大府以查案為請繇是委員會縣
集訊將奸民偽契批銷由牧場內撥地九百六十三畝四分為中
安鎮學校學田批飭每歲由校納賦即由校董招佃收租為學校
常年經費而中安鎮之學校始得於光緒三十四年歷千艱百阨
以底於成噫嘻教育為公益所關動不免於旁撓側沮是何人心

之叵測而作事圖始之多艱耶君子之任事也必先自審居心之何屬果其純謀公益而不雜以纖芥之私則艱險所不必辭極之冤抑無可訴而無所於悔嚮使家大人守道不篤立志不堅一念涉於游移則不惟學校無成立之期而三屯公有之牧田必將為奸民蠶食以盡又使處宵小阻撓之際惜身勞而避人怨箝口引退見險而止誰得議其措注之非而必為是斷斷爭執者誠懼夫學校不立無以盡職責而對鄉閭也今本校規模日廓鄉子弟之負笈來校者愈以滋多猶賴此學田為基本金得以逐漸擴充以寢增其所未備而豈知經始之時當事者奔走呼號不惜忍垢辱以排險難者固已諸艱之備厯乎夫自古承休蒙業忘患必危中

央與地方行政其揆一也後之主斯校者尚其淬厲精神而勿忘始事者之苦心孤詣哉中華民國元年二月記

體慧橋碑記

蓋聞蕭家渡口人盡歌功防海塘邊民皆頌德古人仗義疏財急於公益者未有不名流後世者也廣寧大南關外原有石橋一架名曰挹爽橋經年已久往來稱便突於光緒三十四年七月一日霖雨連旬山水暴發南關一帶半成澤國人民屋宇飄泊者不下數十家財產貨物冲刷者不下數十萬言念及此慘不可忍此橋亦因之而傾頽焉迨水落石出兩岸壁立不堪行人車馬履過俱形不便嗣架木為橋以通往來究非長久之計幸有閩山接待寺

大和尚體慧發一念之慈悲造衆人之幸福不惜重金甘自捐修
易新革故洵可謂萬古不朽之輿梁也自興工以來親自監視風
雨不避勞瘁不辭現已工竣共花洋銀五千餘元由此車馬行人
復稱便利廣寧縣曹公祖培承乏斯土下車伊始抱愛民如子之
心屢次提倡修築此橋奈工程浩大欸項難籌緣僧人體慧有此
義舉得遂其愛民之心願當即具情稟明在案嗣蒙督憲趙批示
僧人體慧鬻產修橋心存利濟殊堪嘉許即獎給心存利濟四字
扁額由縣模刊並命是橋為體慧橋以誌不忘等批凡我社會中
人等聆批之下曷勝欣羨經過此橋者無不感僧人之德也所謂
公德公益者僧實有之是以叙其巔末勒諸貞珉欲令僧之德與

此橋並不朽云是為記時在民國元年

蕭煥章先生國文擬草跋

李維楨子棟

民國五年十月北鎮師範講習所畢業諸生請於教員蕭煥章先生繕印其所擬國文以示余余惟先生學養深粹自慙不逮古人其誨人也務肆力經史以樸學為歸未嘗專究文字也自輓近舍經史以求文復中以急功之念教者既束書高閣以錮其耳目學者亦遂棄本驚末不遑深造以致其精於是古誼失而文字之氣益敝可勝慨哉先生則謂綴文無捷徑惟在師法古人博覽而約取之夫取法乎上僅得其中昌黎韓氏何以非三代兩漢之書不敢讀慙其雜也吾屬縱不能侔昌黎之學之識然由是以求則圖

王不成其弊猶可以霸若其誦法之文類皆自檜以下而尚望其振拔於流俗難矣六經以下暨諸子百家凡雄於文者皆各有其獨到而不相襲文章之不同如其面焉吾不能偏觀盡識則未由通其遺說以想見其為人其何能績學摘文汨汨然達之腕下柳州之為文也必原本六經而旁參之穀梁荀孟莊老國語離騷太史公即博約之說也而豈暖暖姝姝守一先生之言以自足乎先生以此自勵即以此課人以故潛挈古籍必究其真往往一義未安不惜檢數帙以求證而其行為口說或且引伸觸類反覆累千百言嗚呼先生之訓人諄懇如是非所謂道足提躬而仁能煦物者乎何其摯也初勝國庚子之變遠左被兵絃誦絕響大府倡教

育開校省垣延先生為之師是即省校所由昉先生舉經史義法
詔諸子霑教澤者多騰蹕為世用久之復任雞林方言學校學監
歸里隱於縣掾者六七年圖籍紛陳披覽不去手鄉子弟或伺公
暇請益所以獎掖者尤切今則以國文課師範生復首偃以為倡
猶前志也嗟乎文字者我國所固有也以今日人爭嚮學宜其發
揮光大蔚若雲興乃默察舉世學子之心轉似隱抱衰微之懼者
何哉豈果才不古若歟抑士夫之學弊在雜而不純歟蓋講授國
文與物質異物質之學但能輸灌其要義雖生徒無所闡發已足
副教者之求獨誘訓文字則不惟其輸入而必責其蛻化以出其
出之也又必自出機軸不得勒成說以從同而文字之意境神味

則目無從矚而手不可捉搦又無定率公式以為之範此教者所
由望而卻步多怵其啟誨之難也先生於論說外每課人以擬古
舉左國史漢諸作皆務追魂攝魄以肖其真匪特示學子以涂轍
可循即抗心希古者充其量以達乎醇而後肆之域其造端亦不
外是也操觚者果恃源以往又豈有千人共貌之譏哉余從先生
久聆緒論最詳故畧述其嘉誨要情以明不倍師說之義且自媿
於才之不逮其志乃以塵俗羈縛不能竟其所業以上躋古作者
之庭為可喟也

慶雲程大令六十晉五壽序

李維楨子棟

蓋聞桑下僊人添鶴籌以計籍橘中隱士啖龍脯以長生溯東國

之丈人麥秋扇美訪南陽之耆老菊水延齡自來紳紱之儒每侈
岡陵之頌若天宰號神君能拔任棠之薤民歌佛手屢栽潘令之
花方當服官政之年勿唱念家山之曲珂鄉小隱壽域宏開如今
年夏正四月二十六日為我友雲程慶明府六十晉五懸弧之辰
誠兕學可欣稱而麟毫宜縷述者也維公鼎族流輝觴辰茹檠有
男遺腹痛大母而蚕孀生孩甫髦值慈父而見背憶鑿楹之語鯉
訓無聞奉斷杼之箴熊丸自勵而卒能伸眉文囿奮翅名場擷芹
綠於園橋蹈槐黃於鎖院茂才被舉三鯉協管輅之古今器交推
一鷄荷孔融之薦此其可壽者一也自古嚴枚工詞賦而未登巖
廊王揚擅文章而不膺民社未操刀而遽割亦覆鉢之堪虞公則

鼓聽樊輿書披鄧折主縣讞而戴盆畢照稽警政而聚橐必周豈
徒方朔誦書積二十二萬之富抑且大名清訟結四十四起之多
宋廣平不愧鐵石腸裴炎之真乃霹靂手此其可壽者二也既別
宣南復移塞北調熱河而奉檄蒞豐邑而鳴琴縛燬局之元凶蒙
旗悚惕懲營私之奸僮市幣流通都護獎其風裁出沉毅有為之
語觀察精其月旦信清廉自飭之操人方羨逐雷馵蹄魏弱翁行
將大用公則屈簞雲騏足龐士元未罄長才此其可壽者三也夫
勸農馴雉僅傳三異之名建國命龜疇備九能之選苟非快劍難
理琴絲惟遇盤根始彰利器公則惠流涿鹿誠懍陽鱈收豪室稅
至萬二千緡書孝友傳計七十餘校驚羨美噬毒雪冤遠媿於純仁

牛舌適奸詰盜宛同於孝肅束吏以安閭里不遺薪濕之譏濟河
以溉田疇大得桑乾之利此其可壽者四也既而帝網淪輝神州
復且桑田換劫梓里宣勤鞠豺狼之盜清鄉則力靖驍徒保蜃蛤
之商削牘則心殫漁業爰辭遠海復宰平鄉時則魃虐流行賊氛
環逼孤城斗大入寇之警頻傳憲府天遙乞師之書不報守則乏
紅陳之粟戰則無白棒之兵處兩難之境祇應虞寄辭官陳三短
之詞遂效王維旋里託雅興於黃花翠竹寄曠懷於碧水丹山此
其可壽者五也維楨十載相交千秋共勵畿南回首既風雨之同
舟硯北盟心復雲霞之託寄湖坤貞於兩世久企閨型侑益壽之
一觴願陳吏治看宰官身現愈彰賢母之名羨壽者相成合證真

仙之位此日欣傾玉薤豔誇魯殿靈光他年共擷金芝再附商山
綺季

候選巡檢王榮先墓誌銘

邑

人劉慶齡

夢九拔貢

繫建碣樹碑流傳久遠旌門表里稱道弗衰是以實至名歸理有
固然也如北鎮縣北區鎮邊堡村王君諱廷列字榮先原籍直隸
君大父遷居於此歷有年所同懷五人君居其三性孝友讀詩至
哀哀父母生我劬勞輒三復流涕父歿君尚年幼即有志廬墓以
母力阻之乃止年稍長棄儒就吏在縣署禮科充差迨經承任滿
考取巡檢出仕有日矣適遭母喪呼天搶地慟不欲生迨小殮始
進一溢米安厝後遂於墓側結廬以居朝夕哭奠每食必祭事茹

生日以請喪禮祭禮為事風霜屢變矢志彌堅三年如一日清光緒己亥服闋戚友迎歸邑宰聞知詳陳上憲頒給匾額一方文曰人倫表率復繇本境士紳稟請邑宰援例請旌詎料省憲未即轉詳洎乙巳年君弟廷俊以漢教習委任昌圖府教授因事稟見奉天總督趙次帥懇請轉部當即蒙允君於是年八月十六日疾卒春秋六十有六子五孫七曾孫一明年丙午十二月五日奉旨批准官為建坊並發銀三十兩旋以日俄之役地方不靖未能蒞事宣統己酉君弟廷俊署本邑訓導邑紳稟請轉詳省憲以君之神牌入祠俾列祀典而昭賢孝嗣蒙批准而君即於本年入祠君弟解職後時以建坊為念無如有志未逮於民國癸丑夏怛化彌留

之際切囑三子家鳳曰將來無論如何為難必與汝三家伯建坊
吾雖逝世亦瞑目家鳳於東省特別區域高等審判廳書記官差
次購置石料涓吉建設蘄余撰文以誌顛末勒諸貞珉以垂不朽
云爰為之銘銘曰 孝行大節矜式鄙鄉刻石勒銘以誌不忘

魏晉文講義自序

邑

人

蕭懷錦

煥章
附生

粵自文開犧畫秘啟皇墳每奇偶之互陳亦剛柔之迭用是以宣
尼繫易動多連犴之辭左史摛文未屏浮夸之語稟經樹幹周秦
已導其權輿挾藻鋪荼漢魏益恢其厓畛顧世代遞嬗篇帙茲焚
尾閭浩瀚海若之目安窮元圃琳瑯隨和之識易眩自非宗攬諸
家旁搜百氏甄採閎鉅芟荊繇蕪其胡以矩矱先民裨貽來學乎

丁巳孟陬新領憲令議就師範校舍增設國文專科余以溝壑之
姿謬附皋比之末商量舊學鑽仰陳編日月寢馳奄及一稔有唐
鉅製講肆告終當撫六代之文以與諸生相課然採掇所及別擇
宜嚴專驚輕研必傷荼弱蓋典午以降古誼寢衰杼柚增新江河
日下懷鉛之彥擣翰之英大氏絺句雕章織詞組字襍采以矜緝
流靡以增妍揚子雲鄙為蟲雕劉彥和訾為雉窟譬之偃王生而
無骨莫救孱軀孫壽行必折腰迺殊健步騰馥可丐餘波漸頽誦
習所資取則貴約欲正末而歸其本必沿波以討其源緬前軌之
可遵惟當塗為尤盛觀夫建安之際文學鬱興或討賊馳檄氣悍
而辭雄或輯鄰寓書情深而旨晰斯并擅行人之辭命兼辯之士

談鋒故能蘊質瑰奇騁詞雄駿踵武先古囊括方來繡虎之采並
輝靈蛇之珍競握至於章表之製箋札之詞或獨播雋名或羣推
健筆信翩翩之足樂尤奕奕而有神正平搦管協疏密之宜陳思
執轡應緩急之節所謂叩無射之鐘噌吰韻遠拂千將之劍灌羣
鋒鈇誦萬徧而彌甘食千蹠其何厭若夫任沈曼麗之作徐庾哀
豔之篇舉其最著可賅全體雖尋斑窺豹祇限寸管之明而染指
嘗龜可諳全鼎之味是用不揆禱昧寫入雲編猶舉大凡弁諸綱
帙取材未備託體非卑明知玄珠易失遺滄海者必多庶幾片玉
足珍識崑山之所產云爾

史漢文講義自序

邑

人蕭懷錦

煥章
附生

世之肆國文者嘗有恒言曰論辨之文弊在蹠虛大愬學者或馳其思於荒渺於是一變而傾向於叙記夫叙記之文有踰於史志者乎有不以子長孟堅為史氏最者乎顧懷鉛握槧之士每每敝其畢世之精力以規此事而曾不能髣髴其萬一者何也豈是二書者果絕人以夔不可及之域哉蓋內則植體不堅而外之復未醇而遽求其肆固無怪其貌合而神離也昔柳子厚之為文必曰參之太史以著其潔范蔚宗之論孟堅也亦以為其文贍而不穢夫潔也不穢也固未足賅舉史漢之文之妙而殫心力以事文字者則舍是末由涉乎其藩也今之屬文者其始意所嚮何嘗不欲追古作者而與為比洎乎杼寫於紙上其置也或珠玉瓦礫之雜

投而其屬辭之糅則冠甫者不免被以屠沽之服甚至昔之人可
以單辭隻字畢其義者或且覩縷連行累數十言而未已使讀之
者曠如望洋不知其語之何所歸宿此而欲其文之優異是卻行
而欲其足之前也求其庶幾於日光玉潔之一境猶不可得安在
其能與古競也嗟夫優孟固非孫叔也襲其衣冠且失真面况亂
頭粗服以蘄其或肖其可乎哉然則將頡究史漢以為事乎是亦
不然株守史漢未必其即為班馬也本不深者枝必不蔚積不厚
者流必不光劉彥和云文能宗經則體要而不蕪班馬史裁上稟
經訓固其叙贊之所述也史公惟貫穿經傳馳騁古今故能剗百
三十篇之鉅製其植基者閎也孟堅惟兼函雅故旁貫五經故能

簞二百三十年之事蹟其取材者博也綴學之士誠有意乎步趨先哲尚其沉寢乎訓故枕藉乎經籍以蓄其為文之本而後廣之以班馬之紀傳書志以極其變迨含咀饜飮既久且深將必汨汨其來不繩削而自有合也又何事以方隅自囿為余謬任文藝洊及一載今將進魏晉而肆及史漢幸來問字者多能以古人為企響復愬其僻馳而或膠執也故畧舉向之所以自砥者以發其凡民國七年十一月識

重修中安堡區立第一小學校校舍記

知事 王文璞 字晦菴

查該校創始於前清光緒三十一年閱李紳子棟所撰之該鎮小學校記始知各學董等之經營慘淡幾歷艱辛始有是校之觀成

廿餘年來畢業升學者不下數百人其急公好義興學育才之苦
詣謂非難能而可貴哉今春余於赴鄉巡視之便查閱該校成績
卓著而院宇宏敞並有古槐數株窗明几淨雖在闌闌之中頗有
山中靜穆之氣洵所謂講學之善地也惟校舍數間棟折牆傾風
雨飄搖異常危險詢之學董校長等何不從速改建以免意外之
虞均以無款對余不得已倡募款之議遂有陳區長竹書宋區官
壽山商會代表趙聲遠馮紹遠諸君慨然以募款自任嗣有王君
樹萱侯君汲三慨助鉅款當即鳩工庀材重加修葺至於籌土木
督工匠悉心擘畫備極勤勞者皆馮村長佐忱一人之力也今屆
落成之日余喜從事諸君之熱心公益因綴數語用作紀念至捐

欵諸君芳銜則另立捐冊保存俾樂善好施者有所矜式焉

藤藤堡學校碑文

竊聞培養人才端賴教育而教育發達必以經費為要素衡閱近世捐欵興學以教育為心者誠不數數覩也惟蕭公鴻林胸襟豁達識見清超其生平之卹睦鄰里救濟貧窮公之所為事實昭昭在人耳目姑不贅述即創辦學校捐欵一節豈本邑富紳所得媿美亦未聞東省公民樂善好施如公者前清光緒乙巳年捐助城內兩等小學校學田百餘畝後於本村設立學校今近十年生徒卒業者百有餘人建築學舍製造棹橙購備圖書教員之薪水堂內之雜費半多由於公之擔承又於前清宣統辛亥年創設女學

前後捐款四千餘元而公深慮經久經費無著邀集鄰村父老緣
南河兩岸栽種雜樹約六七百畝作後日學校接濟之用公又命
長子露恩報撥吐雲寺荒山一處任勞任怨於今已獲厚利藉非
公之急公好義何能有此回憶我鄉村十數年前人民僅稱樸厚
而識文字通文義者寥寥無幾自我公創設學校以來洞悉古今
古蹟者若而人關心中外時局者若而人男女學生語言清雅落
筆成文者何止百數十人假無公之創設捐助我村屯之子弟焉
有如是之文明並異日不可思議之文明乎茲當公臨歿之日我
父老子弟曷勝追悼之不已衆口一辭立碑為紀念以永垂不朽云

清徵仕郎劉蔭堂墓誌銘

邑

人

孟憲彭

海秋
貢生

公姓劉諱福麟字蔭堂其先世居錦縣後以經商來閩遂家焉父裕後母氏郭兄弟三人公其季也年十三喪父哀感行路者老成重之家故不及中人公精心計權子母不數年稱素封焉公雖以商業起家然遇文人才士每折節下之以是人服其雅量戊戌歲閩鎮紳耆邱有壬等捐貲募款創修文社舉公董其成公操奇計贏悉心擘畫數年累至鉅萬厥後改建學堂文明進步一日千里公之力也庚子秋拳匪蠱起一夕數驚公乃倡鄉團編保甲以衛閭里盜賊屏蹟遠近晏然其急公好義類如此且天性孝友始終不渝慶餘公之異母兄也艱於生計不能自存公時周卹之凡養生送死視同居無少異其他贍故舊卹困窮尤更僕難終公子三

人長國祥頗有父風次文祥尤蘄然露頭角幼嘉祥亦知向學語
云天之報施善人不於其身必於其子孫意在斯乎意在斯乎予
與公誼屬至戚又兼契友既臚陳其形狀復系之以讚讚曰
賢哉劉公萬古流芳治家勤儉教子義方公之丰采萬民所望矯
如孤鶴雲中翱翔公之慷慨何日能忘熱心公益指困傾囊問山
黯淡錦水蒼茫賢哉劉公萬古流芳

馮庸捐產興學記

民國十六年春余來宰北鎮察城鄉各校或校舍不敷或絀於經
費欲擴充而無計而城內師中一校為尤甚適校之西有故都統
馮公麟閣遺宅乃囑閻君宇衡商之其子馮庸請其捐贈學校庸

慨允並言不受政府褒獎邑人感其德建亭校內用資紀念知事
王文璞記

重修曠觀亭記

余於丙寅之歲攝奉天省篆檄王子晦菴知北鎮縣事北鎮去省
城三百六十里多佳山水而尤以醫巫閭山著王子治縣之期年
人和而年豐乃於聽政之間厯泉石訪巖阿以求夫騷人哲士之
遺蹟則醫巫閭山之八景在焉擅烟霞之清概標林泉之殊致而
最勝者則曠觀亭之所在也其地仰觀俯察足以快耳目擴心志
惟是有亭之名而無一椽之庇觀清高宗之題詩則亭之廢也蓋
數百年於茲矣王子度地鳩工作亭以實之而八景於是乎備時

余已改官京師既而東旋王子亦適來瀋陽為余誦清高宗之詩而述其所以重修曠觀亭者余以是慨夫是亭之不作高宗有帝王之力徒以形諸吟詠王子長百里獨能於簿書期會之暇使數百年湮沒之古蹟煥然在目蓋雖有大力空言未足以有為而篤於實行者力雖小所獲亦多天下事殆如是耳雖然連年戰役各縣外濟軍需內防奸宄孜孜皇皇日不暇給而王子措施裕如猶有閒情逸思為山林點綴其過人也遠矣遂書以為之記

戊辰孟秋雙城莫德惠記於瀋陽客次

重修曠觀亭記

北鎮舊為廣寧縣改革後以醫巫閭在舜時為幽州鎮山因以北

鎮名之山在城西十許里其勝處曰大閣近接道隱谷呂公巖曠
觀亭雲巢松蚪蚪碑桃花洞聖水盆諸古蹟曰八景曠觀亭者八
景之一也遙望羣峯則奇石挿空斜覆矗立幽邃窅負峭削天成
俯瞰城闔則萬家煙火比櫛若鱗極目蒿林吹岸如薺羅列衆妙
靡可殫述昔人相傳為遠東丹王讀書堂故址豈非其處耶清高
宗宣宗先後曾巡幸於此而高宗題詩有山堂此日已為亭眼底
平陵碧海滄之句蓋謂是也又考石渠寶笈著錄東丹王逐鹿圖
知王樂飢潛志於道隱谷中嘗有相終焉之趣而曠觀亭址之舊
為貯書處似非臆說顧時代湮遠亭久荒廢僅存柱礎遊者惜之
歲戊辰知北鎮縣事王君文璞集資復修頓還舊觀既成乞文於

奉天省志卷之六
卷六
余余前時巡鹽過境因得一縱遊觀輒思題名崖石以志歲月而
勿遽未果今歲來綰省府喜見其廢而復葺也喟然嘆曰夫歷代
古蹟有深入人心常使之流連而不能忍去故走洞庭之野者昂
首興歌過彭城之墟者愴懷增感而東丹王聰敏好學博通陰陽
芳風遐流曠世若接吾知登斯亭者必有瞻矚高蹈憬企淵軌者
是則有資於文獻而寧僅便於遊觀已哉回首昔日遊縱勝處猶
歷歷在目遂泚筆而為之記

中華民國十七年十月

奉天省長程文選撰并書

重修曠觀亭記

醫巫閭山之椒有廢亭遺址遊人每指而目之以為此曠觀亭之

故跡然不能考其創建年月昔清高宗嘗為醫巫閭四景詩刻石
茲山四景者即翠雲屏道隱谷聖水盆而其一則曠觀亭也其詩
云曾聞萬卷貯山亭欲勝劉家陋室銘椽桷縹緗消已盡惟餘名
共碧峯青未暑癸卯季秋下澣宸章焜耀玉麗珠輝蓋乾隆四十
八年之作也夫醫巫閭在有清全盛之時本為車駕巡遊之地自
純廟御極於乾隆八年始舉謁陵鉅典而癸卯八月由熱河啟塗
恭謁興京諸陵則其第四次也余嘗繹其詩意竊以為茲亭之設
殆如東丹王之望海堂為前代藏書之冊府而亭名之錫其有取
於卓犖觀書之義歟乃歲月侵尋階城湮圯洎乎乾隆癸卯此亭
已杳不可尋欲求琳瑯萬軸之儲漠然徒見山青而水碧而其未

歸泯滅者亦僅有其亭名存在况再閱百數十歲有不並此名而同慨銷沉者乎嗚呼此不能無待於修舉矣王縣長晦菴來宰北鎮既逾年政平而事理乃鳩工剏石就亭基而重建之其費約其制樸逸而無華邑人相與歡欣鼓舞以為勝蹟之復非縣長莫之屬也夫以前皇所流連慨慕而不得一覩者晦菴縣長乃興復於百四十有四年之後其心力之果毅何如也則凡比年來之振興庶政不皆可於此亭推之哉余羈軍幕久西望鎮山煙嵐如接夫安得一涉斯亭拓其心於昭曠之域乎戊辰秋季李維楨記

壽生產科學校創始記

戊辰十二月十五日即十八年一月二十五日北鎮監督吾友王

晦菴寓書於家驥曰日前猥以賤辰承諸友好醪金為壽屢辭不獲厚貺頻來拜嘉之餘難安寢饋熟籌默計與其壽不佞之生母寧壽人以壽世乎友人咸曰善乃議將賀祝之醜遺創設產科學校庶推友朋之高誼廣誠求保赤之心藉賤子之生辰邀婦人孺子之福當此學校創始子曷為之記以誌不忘家驥不文何敢以譎陋之詞謬為紀載重違雅命謹掇顛末而濡毫焉夫北鎮古醫巫閭在也山川毓秀代有傳人岳瀆鍾靈挺生名世晦菴吾友以文星列宿現宰官身撫治斯邦殷殷以愛民興學為志菁莪雅化教養兼施治績流傳筆難殫述獨產科一事尚付缺如茲以醜壽之金悉作創興學校之費遂設產科學校附之以醫院名之曰壽

生仁政仁心實寓壽世壽人之意從此嵩中嶽降誕育英才妊婦胎兒咸沾德澤異日者學風蔚起鑒物與民胞良相同功先醫國於保種作萬家之生佛開產校之紀元溯創始之賢侯當為我晦菴監督祝無量壽也是為記新民馬家驤撰記

中華民國十八年二月二日

貧兒學校創始記

李維楨 子棟

貧兒學校十六年十月十一日成立北鎮貧兒求學初無專校縣長王公晦菴蒞任提倡教育不遺餘力復念窶人子弟就學維艱議先立一校以宏甄育適有陳慶祥募到款項一萬一千元遂以此為開辦費就大佛寺後院之官房十六楹設校以李恩溥為學

董兼校長延教員三員招生一百一十人用普通初等教科書教授惟修身科則用孝經小學以端蒙養就學者極為踴躍助款者先後接踵將來或可推及四鄉也

藝文

詩歌

金

醫巫閭山 七古

蔡珪

幽州鎮山高且雄倚天萬仞蟠天東祖龍驅之不肯去至今鞭血
餘殷紅崩崖暗谷森雲樹蕭氏門橫入山路誰道營邱筆有神只
得峯巒兩三處我方萬里來天涯陂陀繚繞間風沙直教眼界增
明秀好是嵐光日夕佳封龍山邊生處樂此山之間亦不惡他年
南北兩生涯不妨世有揚州鶴

閭山 七絕

蔡珪

西風絕境撫孤松千里川原四望通但怪林稍看鳥背不知身到碧雲中

十三山下村落 七絕

蔡珪

閭山盡處十三山溪曲人家畫幅間何日秋風半篙水小舟容我一簑間

閭山懸巖寺觀宇文公吳東山題名 七古

趙秉文

幽州之鎮醫巫閭襟帶遠碣吞元菟誰問青壁一萬丈坐我滄

一本作陸

海之方壺有泉聲而飛有松實而腴雲煙出沒隨朝舖三百六十

古精廬雲端削出金芙蓉

一本無此句

望海寺前列幢蓋鎮山亭下羅篁

竿廣寧太宗來肩輿今日之遊差樂乎問而不答心語口高士例

與山相娛壁間題詩六君子髣髴記是高蔡吳

一本作壁間題詩亦髣髴記是詩人高蔡吳

山僧晚壁笑問吾他日還有此客無黃華老人醉騎驢向天亦藐

懸巖圖

元

和張敏之詩七十韻并序

耶律楚材

敏之學士遠寄新詩七十韻捧讀之餘續貂以尾聊資一笑
壯年多輒軻晚節歎行藏故國顏網穢新朝明德香雄材能預算
大畧固難量迭出神兵速無敵戎武揚本圖服叛逆何止翦譎張
西討窮於闡東征過樂浪彗侵天壘壁光動太白鉞整整車徒威
鱗鱗旗鼓望天皇帝深責重賢帥廟謀臧江左將禽楚河陽已滅商

英雄皆入彀，強禦敢跳梁。採訪軒車闕，司農官吏忙。輕徭常力足，薄賦不財傷。勲業超秦漢，規模邁帝王。流言無管蔡，奇計有平良。增葺新文物，耕耘古戰場。蛟龍方奮迅，鵬鷃得翱翔。偶遇風雲會，爭依日月光。永疇千古恥，一怒四夷攘。虎帳十年夢，龍庭幾度霜。迎降初請命，出郭遠相將。久敵真宜死，寬恩何敢當。赦書民有幸，歌詠壽無疆。扶杖聽黃詔，稱觴進白狼。散財竭庫藏，拔將出戎行。殷絕仁猶在，周傾道不忘。來招燕郡內，入覲大食傍。戎服貂裘紫，星輶駿馬蒼。中春辭北望，初夏過西涼。瀚海洶而湧，陰山傍且徨。閑雲迷去路，疏雨潤行裝。出處空興歎，風光自斷腸。典刑陳故事，利病上封章。天下援深溺，中州冀小康。風俗承喪亂，籌策要優長。

痼疾如神附遊魂笑鬼張仁術能骨肉靈藥起膏肓避禍宜緘口
當言肯括囊遭讒心欲剖涉苦膽先嘗北漠絕窮域西隅抵大洋
詩書猶不廢忠信未能忘瓊補連腮帳繩穿朽腳牀郊行長野興
人靜若禪房回鶻交游熟崑崙事跡詳風煙多黯黯雲水兩茫茫
災變垂乾象妖氣翳太陽髯龍三島去玉葉一枝芳明主初登極
愚臣敢進狂九疇從帝錫五事合天常大藥陳金石朝服具冕裳
降升分上下進退有依昂拓境時方急郊天且未遑應兵無血刃
降虜自壺漿按堵無更肆因敵不餽糧宸心尊德義聖政濟柔剛
恩澤函諸夏威稜震八荒勢連西域重天助北方強舉我陪三省
求賢守四方錦衣捐毳褐肉食棄糟糠隱逸求新仕流亡集故鄉

百官欣戴舜萬國願歸唐耕釣成生遂工商樂未央會將封秦岳
行看建明堂每歎才雕篆長慙學面墻君恩予久負賢路我深妨
覆餗恒憂懼持盈是恐惶故山松徑碧舊隱菊花黃太守方遺鳥
初平正牧羊厚顏居此位若已納於隍吟嘯須歸去香山老侍郎
懷古一百韻寄張敏之

耶律楚材

興亡千古事勝負一枰棋感恨空興歎悲吟乃賦詩三皇崇道德
五帝重仁慈禮廢三王謝權興五伯漓焚書嫌孔孟峻法用高斯
政出人思亂身亡國亦隨阿房修象魏徐福覓靈芝偶語真虛禁
長城信謾為只知秦失鹿不覺楚亡雖約法三章日恩垂四百期
漢興學校啟文作典章施贖武疲中夏窮兵擾四夷嗣君恩稍失

劉氏德難衰新室雖興難真人已御基魏吳將奮起靈獻自荒嬉
賊子權移漢姦臣塢築郿三朝如峙鼎四海若焚絲纜奉山陽主
己生司馬師仲謀服孟德葛亮倍曹丕唯晉成獨統平吳混八維
有初終鮮克居治亂誰思蟬鬢克蘭掖羊車遶竹歧孫謀無遠慮
神器委瘕兒國事歸椒室民饑詢肉糜為人昧菽麥聞墓問官私
衛瓘嘗幾諫何曾已預知五胡雲擾攘六代雷奔馳川谷流腥血
郊原厭積屍天光分耀日地理裂瓜時歷數當歸李驅除暫假隋
西陲開鄯善東鄙討高麗鸞駕如江國龍舟泛汴漪錦帆遮水面
粉浪污河湄府藏金帛積生靈氣力疲盜賊天下起章奏禁中欺
海內空龍戰河東有鳳姿元戎展鷹犬頡利助熊羆奉表遵期命

尊王建義旗經營於盜手禪讓託君辭豪哲歸吾穀要荒入我羈
太宗真令主貞觀有皇規正美開元治俄成天寶悲曲江還故里
林甫領台司裂土封三國纏頭愛八姨霓裳猶未罷鼙鼓恨來遲
逆寇陵丹闕君王捨翠眉兩京賊黨滅方鎮重權移朱李原堪歎
石劉亦可嗤九州重構亂五代薦荒饑遼宋分南北翁孫講禮儀
宣和風侈靡教主德庸卑背約絕鄰好興師借寇資旋知喪唇齒
何事撤藩籬失地人皆怨蒙塵悔何追遼家遵漢制孔教祖宣尼
煥若文章備康哉政事熙朝廷嚴哀冕郊廟奏壝荒校獵溫騎射
行營習正奇南州走玉帛諸國畏鞭笞天祚驕人上朝鮮叛海涯
未終三百祀不免一朝危鳴綠金朝起桑乾玉璽遺後遼興大石

西域統龜茲萬里威聲震百年名教垂武元平宋地殷禮雜宗姬
治國崇文事拔賢尚賦詞邦昌君洛汭劉豫立青淄大定民興詠
明昌物適宜日中須景昃月滿必光虧肘腋獨夫難邱墟七廟隳
北朝天輔佑南國俗瘡痍天子潛巡狩宗臣嚴守陴山西盡荆枳
河朔半豺狸食盡謀安出兵羸力不支長圍重數匝久困再周期
太液生秋草姑蘇游野麋忠臣全節死餘衆入降麾文獻生三子
東丹第八枝虛名如畫餅遺業學為箕自笑蓬垂鬢誰憐雪滿髭
撫膺長感慨搔首幾嗟咨車蓋知何處衣冠問阿誰自天明下詔
如我素通著發軔裝琴劍登車執策綏窮廬或白黑驛騎半黃丕
肥瓔白如瓠瓊漿甘似飴天山連北府瀚海通西伊天馬窮渤澥

神兵過月氏感恩承聖勅寄住到尋恩春色多紅樹秋波總綠波
不須賒酒飲隨分有驢騎畝畝棲禾粟園林足果梨春粳光燦玉
煮飯滑流匙聖祖方輕舉明君應樂推龍庭陳大禮原廟獻明粢
萬國朝金陛千官列玉墀求賢為輔弼舉我忝丞疑才德真為慊
顛危不解持願從麋鹿性豈戀鳳凰池投老誰為伴黃山有敏之
余作懷古詩百韻非徒作已使世之人知成敗之可鑒出世之人
識興廢之不常也因作偈以見意云「歷代興亡數張紙千年勝負
一盤棋因而識破人間夢始信空門一著奇」

明

具瞻亭歌

御
史
程啟克

高岡倚危巔上與浮雲齊林岑疊舞鑿斜徑吞吐日月分東西盤
旋曲折下復上凌空百丈懸天梯聳身數息不可到眼花神悸忽
如迷陽坡寬廠抱山腹羣峰輻輳飛寒瀑高人指點歷畫圖結構
孤亭縱心目雜芳繞徑搖情光石龕鍾乳流瓊漿開窗攬擷生靈
籟自然身世渾相忘紫芝黃石爭絢爛啼鳥落花還復見烟霞澹
宕抱遊人可惜風光自流轉

攬秀亭歌

都督毛倫

秋風幾日搖霜樾北鎮西山兩奇絕開窗覽秀小亭幽景物撩人
自然別丹崖翠壑吐仍吞紅雲白草入深垣短碑古塢幽蘭裏野
店孤春何處村荒榛小逕不盈尺谷口縈紆更滿入蕭蕭木落滿

天秋豁壑斷流堆亂石山形地脈亦何崇上有千歲之蒼松孤高
偃蹇傲冰雪秀拔天地輕秦封紅霞幾縷吞朝旭突兀高樓斷山
曲南峯勢壓北峯雄劍戟森然對羣玉綵雲縹渺棲蓬萊金闕森
列紫極開山空寂寂白晝永野曠落落清風來飛簷鈴鐸響朱閣
石殿簾櫳開翠幕迴峯轉壑挹清溪疊嶂層巒連碧落山原迢遞
千里通萬物蒼茫一望中放懷聊取片時適仙境未必人間同白
雲一片青山小野戍煙霞秋意老林梢幾點認歸鴉天外數行橫
海島時時乘興縱登臨與客攜壺共賞心海闊天空雲浩浩臺高
樹合影沉沉

讀書 七律

賀 欽

清晨起坐小茅堂萬事無關一炷香
展卷細觀前聖奧馳名敢學
世人狂也知老病年光促爭奈詩書意味長
但願桑榆粗有得肯
隨流俗嘆斜陽

和瀋陽守愚邱先生韻 七律

賀欽

聲利沉疴幸已瘳煙霞痼疾豈須憂
非關遜世矜高節自是匡時
乏遠猷鎖闥兩年空竊祿雲山十載免包羞
管窺本是遠東客不
願重過五鳳樓

清

過廣寧望醫巫閭山詩 五古

清聖祖

名山插霄漢朵朵青芙蓉連亘數十里
隱見千百重迢遙不可極

黛色堆奇峯窈窕復岵鬱鬱多蒼松中有桃花洞杳靄常雲封
萬古鎮幽州秩祀同岱宗盼望生引領瞻顧停六龍何時一登覽
盪滌疏心胸

御製五言三十韻

清高宗

奠宇坤維鎮神堂碣石開蓬萊參漢廻案衍向陽恢舜典升柴載
山經括地賅曾從望昔度可又負今廻裡祀帛籩薦威儀卿尹陪
達誠仙闕退問景玉鞭催鷲入栗梨墅延緣蒞施堆圃場崇有積
雞犬靜無猜頻見耕荒隧疇能保一坏日高方覺煖風細不生埃
盤谷深成阻牛山久已咳寺顏僧避去屋寂鳥飛來遂造崎嶇遍
從看草木纔地靈自呵護天意本栽培寫霧豁宮霍流漸落漩洄

柳書人作字松抱石為胎初挾塵凡限中宏造化胚便因窮窈窕
旋命減輿臺詰曲尋崎逕蒙茸籍嫩苔懸空飛瀑水切顛聳瑤臺
尚有芝英碣寧妨薦福雷武陵雖假藉洞口試徘徊作記徵彭澤
成詩憶楚材寧知進士第轉遜岳陽杯肥遯幽棲處翹思獨往才
雲巢真可號龍種是誰栽最後中峯矗居然一笠菟海天惟浩蕩
心目與兼該始遇欣佳矣曠觀誠壯哉安期如卻掃意不在蓬萊

遊醫巫閭山雜詠

七絕八首

清高宗

翠雲屏

其一

摧萎孤峯削玉華山樞旁出古槎枒何人解事為鑄泐語鑿空猶

道女媧

其二

廟西峙立翠雲屏凝盼誰能擬色形一石丈餘大方廣補天二字
出何經

道隱谷

其一

深谷棲遲可樂賢路遙偶未訪林泉東丹潛志讀書處逐鹿成圖
豈忽然

其二

聞道深山足隱淪與居木石柱松隣誰知潛志樂饑者原是攫身

逐鹿人

聖水盆

其一

垂崖迸水落絲絲冬不凝冰事匪奇應為仙家修養法將臨玉女
洗頭時

其二

列崖垂落水如簾隔斷塵氛靜且恬多有朝鮮人泐句箕疇文化
至今漸

曠觀亭

其一

飛來一笠冠
噴岬海水天
雲入曠觀奇蹟無窮
留宇內路幽探遍
故應難

其二

山堂此日已為亭
眼底憑陵碧海亭
應是遼王貯書處
至今秀色蓄眸青

古松七律

清高宗

鎮廟門西似蓋松
半存枯幹半龍蔥
凝神如見抱朴子
圖貌慙非陳所翁
立下忽疑晴與晦
現前可悟色兮空
何當六月根旁坐
讀疏乞聽謾謾風

廣寧道中作七古六首

清高宗

廣寧道中跋馬行敗壘荒堡頻逢迎云是當年防守處江山坐失
嗟有明

外猜內忌政紛亂謀賊不從不賊薦其間門戶尚相爭文臣掉舌
武臣竄

增餉未逮士卒家道遙河上擁榮牙成梁華表至今在爵里世胄
滄桑誇

候臺烽火更番置朝偵夜望亦云備設邏徒佈千萬兵王師一舉
皆捐棄

遼東不保全遼西破竹安禁飛騎馳我來撫蹟仰前烈百年古縣
成雍熙

皇天無親德為本民不可下曰可近一言敬告守器人待言守時
計已晚

觀音閣即景二首

清高宗

鎮廟更西北禮成一問蹊縱觀連海闊直上與天齊不盡奇和詭
誰知端與倪無煩重徵古七景閱前題

詰曲歷雲關精藍廻嶽間漫茲悟空色較昔異容顏胎石松多瘦
依巖鶴自閒天成同入路三載別盤山

謁北鎮廟七律

廣寧知縣 項 蕙

山靈無恙氣氤氳古廟松楸宿白雲斷碣猶存梁父禪劫仄難認
嶧山文不辭登眺尋僧話尚有林巒待鹿羣感慨相傳思往事悲

鳴雲際雁紛紛

遊觀音閣 五律

乘興歷危巔上方樓閣連四圍山斷絕一徑鳥飛懸覽勝猶疑夢
憑虛別有天武陵津問後此地鑿何年

赴錦至二台子有感 七律

舉 人 陸鴻遵

輪蹄僕僕走風塵爪蹟重經感已陳僵柳貪眠疏過客青山戀睡
笑征人春花半謝居停主秋扇應捐措大身千古滄桑從此悟婆
娑漫為樹傷神

歲暮散館諸生陸續而去誌感一首 七律 舉人 陸鴻遵

負秀含芳萃絳帷歲行將盡賦遄歸春殘陌上人將去秋老江南

雁欲飛滿院西風霜葉散一天落月曉星稀來年再理丹鉛業桃李花仍豔四圍

咸豐庚申春闈報罷歸途和李問渠作

七律二首舉人

陸鴻遵

瀟洒何如陸放翁不將成敗論英雄江山有約三春後富貴如花一夢中萍水行蹤參落月尊鱸鄉味飽秋風匆匆且上遼東道回首名場色相空

畫眉深淺不宜時京兆風流非所思五色任誇才子筆一箋欣和故人詩冶容心事何堪問淡掃工夫祇自知甘逐明妃共歸去長門草色掩金卮

春雪

七絕二首

舉

人陸鴻遵

曉來徧地罩銀沙
四顧園林未有花
天意或嫌春寂寞
權將玉戲鬪繁華

飛絮初時未染塵
玲瓏皎潔似完人
須臾化作泥塗辱
到此知為墮身落

寄興 浪淘沙

歲貢生 陸鴻儀

世界幾滄桑
無限興亡紛紛鷓蚌
為誰忙
蝸角戰爭何日歇
欲問斜陽富貴任輝煌
轉眼虛荒地維天柱在
綱常試看忠臣與義士
日月齊光

自嘲 浪淘沙

歲貢生 陸鴻儀

遠海毓英豪
倚馬才高書長無事走霜毫
咳唾隨風落
珠玉獨冠

詞曹筆下起波濤不受籠牢摘詞直欲薄風騷可惜無人垂另眼
為換青袍

寫志 鵲橋仙

歲貢生 陸鴻儀

誅茅拓土通今博古事業不嫌辛苦家庭充裕更雍和勝似那擔
圭曳組花含穀雨秧分蔬圃樂境何堪悉數聽他年運會升沉再
把那經綸吞吐

春忙喜咏 七律

歲貢生 陸鴻儀

鄉村四月少閒人勤動誰如我里仁剛到花朝子耜迫偶逢穀旦
索綯勻雪晴繡壤兒挑菜風靜閒閨女織絹一種邠岐餘俗古譜
成歌咏問先民

紀游三十四韻

舉 人 劉春娘

巨鎮天假柄靈性問蒼穹蜿蜒走遠塞雲海隨之東排界而縱橫
如江馳艤艫談山不出戶臆說欺瞽聾嗟余蟄伏久眼界嗤冬烘
度海良友至寄約尋崆峒維時九月半天際歸霜鴻龍湫始觀水
再訪琉璃宮名勝百年廢蕪徑埋蒿蓬裏餓賈全勇矍鑠從茲翁
危梁躡半趾險厓搖雙瞳力瘁目則豁澗樹飜青紅流水萬琴筑
怪石千羆熊卓天者何筆咄咄還書空巉巖鬼斧削巖窠金城崇
益信洪水始割蕩相磨礪水去石乃現一一排青葱望海何代堂
浩劫經沙蟲石門不可上倒影垂丹楓昂首已天外放眼煙霄中
世界成紫光萬垤青濛濛我欲營八表八表安可窮善然一長嘯

振袂來罡風大園杯芥耳太始應有終混沌誤鑿竅智巧悲玲瓏
陵谷倒桑海微物焉足雄堪笑讓皇瓦陶冶勞良工澄泥法宣和
烈火燒青銅未央與銅雀真贗將毋同考古祇益惑碣沒苔花蒙
萬卷散已淨奚有丹青功斜照忽西下凌水浮長虹言歸訪丹厓
晚飯餐園菘茲游洵足記寫詩付紫公

唐介仁像贊七古并序

舉人劉春煊

丙子初春余以冗事小住省垣而唐兄介仁甫以閩陽才子
觀政司農握見之餘苔琴甚洽公餘時復過談遂覺塵烟如
掃酒酣出小照索題數年來江花瘦藻半消况戎馬間矣况
余之不文者耶賦長歌一章誌遇即奉

甲戌之年我三九嘖嘖唐君滿人口丙子之春我渡遠大笑都門
忽抗手唐君魁梧身七尺偉幹豐軀面微黝眼光曠若營四海舌
辯精如探二酉溫顏春霽湘中草峻骨秋寒太華藕相逢磊落襟
懷開意氣縱橫見杯酒太阿鋒銚匣不得談箸超超膽如斗嗟余
潘北九往復盧駱王楊皆好友埋頭蒿莽多偉人達者高飛并銜
綬自古關東產異材跡弛如君得未有可惜時清尚資格不然全
印卧而取宦海浮沉半刺中大隱聊復勝耕畝酒酣為展黃絹圖
索我新詩囑題首阿誰頰上善添毫畫者依稀記曹某我於畫禪
未了悟輪廓粗識精與否不見王孫寫墨蘭安得仇英撰宮柳二
十年來鞞鼓多世事倉皇變衣狗印一繪事今昔異鏡影紛紛亂

妍醜何物蕭蕭老畫師下筆神酣解衣走鬚眉軒朗躍紙上此形
得此雙不朽披圖愴恍若有遇惠日澄觀立許久諫議家聲六如
澤不然豈讓荆川史簪組詩書勝球壁嗚呼此本宜珍守再拜還
圖筆華溢愧乏珠璣報瓊玖

題王吟舫說劍圖七古

舉 人 劉春娘

吟舫先生老名士壯遊岷江晚歸里腰間龍物世莫比酒闌說劍
荒亭裏亭外蓮花照秋水亭上美人越處子美人如蓮舌亦蓮三
尺芙蓉光四起當年景畧西入秦寶光躍出延平津曹沫上壇劫
盟長朱雲下殿斬佞臣夜半一揮動天地斑剝戰血苔花新公之
先人猛如虎帶甲連天佐真主亂來擁劍趨王侯亂後還鄉樂歌

舞此劍摩挲二百年烏衣門巷鎖秋煙豪曹巨闕猶如舊割據英雄空惘然先生七葉金貂貴回首家風生感喟干將猶作不平鳴河朔風流燕趙氣匹馬秋風入劍門成都市上酒壚溫向人一諾不輕許投我千金未是恩信陵門冷侯嬴老彈鋏方知歸去好滿眼徐君果是誰延陵說與卞和道孔章望氣本多事老氏善藏已為寶宦海茫茫是畏途五陵豪氣祇斯須雪泥鴻爪從何說儒俠鬚眉是此圖

題青蓮醉酒圖 七古

舉 人 劉春娘

酒星飛落瑤光紫云有神仙作才子長安貴人不知名沉醉金門招不起甕頭春色澄江波湘陰笛裏梅花多壺中事大日月小涼

風倒傾金叵羅醉酣步上華清殿天子金箋貴妃硯眼中本無高
常侍豈復更有華陰縣阮籍從來眼不青漁陽鼓動何須醒低首
宣城自語耳世間安有長庚星歸來華嶽捫星斗高取銀河盥雙
手酒香隨波落人世長江一夕化為酒榜客惟看宮錦袍金陵南
下月如刀何當獨上蓬壺頂手把珊瑚釣六鰲

北鎮祠懷古 x 律

舉 人 劉春娘

御香花碣紫苔皴想見金元闢莽榛何代衣冠崇宦寺百年祠禱
誤君臣碑橫蒿眼森題字山出城頭遠瞰人浩劫殘灰餘片石斜
陽憑弔亦傷神

漢疆無慮古雄藩憑眺川原事莫論遺廟難尋耶律相亂山誰弔

賀黃門無名泉老雲如渴攬秀亭荒酒欲昏此地不須言戰守前朝猶有未招魂

金遠三衛竟何如華表蒼蒼歲月徂北鎮祠猶神物拱東丹瓦是劫灰餘千年故相仍存社百代明王貴讀書守法從來勝守險分明覆轍戒前車

遠右羣峯北鎮尊岡巒風捲作潮奔墳頭拜母將軍石巖下梳頭玉女盆山勢南來標地脊水聲東落浣墻根淒涼勝國何堪說猶有朝鮮忍再論

題翠雲屏 七律

劉春煊

粉堞煙樓見廣寧連山奔走隱藩屏秋生遺廟三朝古雨蝕豐碑

歷代青北限塵沙低朔漠南浮島嶼小滄溟聖朝全寄河陽宰刁
斗無勞曙星

登慈航寺遠眺 七律

舉 人 劉春娘

瑤草奇花古洞天藤蘿百丈石如船耳根寂後猶聞磬目力窮時
僅辨煙振袖恐隨山影落登高纔識地形圓摩挲斷碣尋殘篆惟
訪前朝創建年

登廣寧東嶺龍王廟 七律二首

劉春娘

戰塵飛盡幾周星獨立朝煙眺勝形
麥色林光高下綠城頭山足
混茫青泠泠梵磬穿雲出浩浩人聲隔水聽
我熱心香拜龍伯要
祈三日雨溟溟

縱酒登高愧賦才
紅荆籬下小門開
菜花成晦黃如繡
樹色籠城綠欲來
朝市滄桑陵谷變
鐘魚朝暮古今哀
無情祇有前溪水
獨照斜陽浣碧苔

秋柳

七律四首次王漁洋秋柳原韻

劉春娘

河橋南望儘銷魂
又向西風怨玉門
樓上翠寒思婦袖
襟邊黃暈酒人痕
荒城極浦一聲雁
落日歸鴉無數村
惟問蕭梁三百寺
涼煙涼雨不堪論

姑蘇城外萬條霜
秋盡江南第幾塘
獨有將軍搔白髮
早令詞客悔青箱
逢迎人世羞陶令
管領春風負漢王
落葉蕭蕭那可數
黃驄愁過碧雞坊

郵亭無復挽征衣回首青樓舊夢非似爾多情應護落向人顰黛
總依稀愁令翠燕和煙織忍見棲烏背葉飛寄語章臺街畔侶舞
腰待試主恩違

疏枝瘦影鎮堪憐冷眼初醒別後煙東道青袍遲進酒西樓盧婦
嬾裝綿未應庾信工愁賦每對桓溫說盛年我欲盡銷才子恨株
株栽向御溝邊

歐羅巴雜咏 七絕十三首

劉春娘

行期

航海東來二月時荼蘼花了落帆期風潮順逆君休管去五來三
任舵師

海道

天南西下指蘇門大浪山前欲斷魂行過婆羅洲北望占城東轉
即中原

賦稅

子母工權即將才農田無賦稅闢開埔頭占徧東南海肯費金錢
濟衆生

宗教

不將甲子紀新正苦記耶穌幾降生一自漢年羅馬後至今雙教
觸蠻爭

技藝

火輪船外火輪車金木良工做世家北土荒寒南土熱布棉彈徧
日南花

形狀

虬髯隆準目深黃短髮鬢鬢爾許長惟有妖姬幕中土金環雲髻
碧圍裳

鴉片

印度山川土正中而今禪教熄宗風菩提貝葉煙消盡罌粟花開
徧地紅

土產

番薯青秧菜紫花綠由橄欖比胡麻羽綾毳緞輪機布不數江南

織造家

疆域

海外戎疆正朔方
滄波直北是冰洋
水程七萬來通貢
譯使逢人說漢唐

世系

國祚遷移孰短長
金門珠屋事荒唐
可憐閨用遭陽九
齊拜天皇武媚娘

火器

重洋詎解火攻奇
堪恨蒙元撒馬兒
一自中星添表望
虎門山下有黃旗

界限

烏拉橫天接地球地中滄海亦東流井蛙穴鼠休相訝此是人間

第二洲

埃及

麥西風土勝歐羅紅海東環湧紫波七十萬書回部燼不須秦火
問如何

遊仙詩五首

當年足下看雲生三疊琴心道已成誤寫上清蝌蚪字一篇真誥
不分明

風引三山境寂寥碧天吹斷水晶簫關心子晉顏如玉身隔雲屏

手亂招

迢迢白練耿秋河
織女從來恨已多
八萬二千明月戶
不知何處認嫦娥

相招須把碧芙蓉
海上歸來雪萬重
同住玉真清冷地
不司符籙便從容

東海揚塵阿母家
年來勾漏少丹砂
有人手執青鸞尾
獨立蓬山掃落花

烈婦詞并序

廣寧知縣 李景祥 炳甫

烈婦廣寧農家女也
姓張氏年十七來歸
于李翁悅其色屢挑
輒見拒姑又迫之從
婦拒如故由是失歡
以橫槌死母家見傷

重且致死非一物知有冤欲聲其罪大懼啗以金又用危言相
威嚇事幾寢會有所聞往偵得實乃按律問擬乞大吏上其事
於朝并請旌表如例恐邦之人久而莫之知也爰紀以詩俾後
之君子有所覽焉光緒二十四年上元前一夕記

河水莫洗新臺恥衛宣醜齷何足齒畢竟齊女志不貞燕婉之求
甘得此惜哉未聞烈婦烈顏如桃李操冰雪翁思年少或可欺至
再至三苦相逼相逼日甚憂思多曲徇翁意奈姑何幾微偶失輒
加罪助之為虐揚其波一日小郎自外至問渠垂淚因何事吞聲
飲泣不敢言祇道所欠惟一死豈知老羞翻成怒恐把前失從頭
訴生將鴛鴦兩拆開咫尺相望銀河阻五月重五觀賽忙翁留不

去心傍徨鷲鳥欲搏色先見回首瞥驚立我傍是時婦已奪門走
失聲高喊集鄰吏翁猶蒙被作酣眠自顧亦慙顏孔厚從此蓄恨
儼成仇詎許常貽鄰里憂明知去禍當不遠人頭畜鳴難為謀惟
彼烈婦有本性貞操誓與寒泉併與其生恐遭玷污孰若死得歸
清淨會當晨汲提甕前入井拌將微軀捐救援乃出謨蓋手道旁
物議徒紛然或云此老應愧悔人之多言良可畏或云彼昏苦沉
迷禍不臨頭不知退怨毒愈深變愈亟交罵迭毆無終極麾兜外
出旋閉門耳聽號哭救不得招窗穴隙試窺視牀間縛人如縛豕
錐刺鞭打迭交加俄驚氣絕長已矣形如槁木色如土情急遂向
妻門訃繼恐窮詰來責言告畢回身便抽步爾時妻鄰得聞之父

母兄嫂皆驚疑父曰吾女素強壯胡然忽同風燭吹母曰兒歸慘
不懽欲語復止恒長歎就中必有難言隱今果橫折非無端兄嫂
含淚應諾諾老成之見良不錯否則奔赴亦常事適纔形狀何驚
愕牛車取道迤邐來入門見屍大悲哀雙目不瞑怒猶視忍令冤
抑沉夜臺而彼嘵嘵仇人口反言婦德多虧負即加鞭打罪亦宜
天奪其算又誰咎象聞斯語怒氣生行路羗復抱不平敗檢滅倫
一至此乃猶怙惡逞縱橫事發亦知千重律排解爰遣調人出脅
以威力動以財啗喝牽制正多術諺云千金不死市得贖所求亦
良已况彼蚩蚩何能為援而止之必中止農家質性恒苦柔跋前
疐後難自由爪牙森列防反噬隱忍不發行將休蘭桂摧殘玉空

折恨長埋兮孰昭雪鬼神來告真宰通若有所趨揚芳烈言者鑿
鑿聽者悲不知焉用長吏為汝其前去急收捕勿使望風先奔驅
越日罪人就拘繫鷄奔鵲疆實階厲可憐弱質受奇冤暴露經旬
猶未瘞法當檢驗速前往瞻傷折視就明朗癥痕一一刻畫多觀
者涕零莫能仰身上受傷作何色或紫或青或焦黑致傷之具又
何操為錐為烙為榜掠及詢右手失將指云因抵烙成殘毀最後
恕釐創尤深比對分明視此屢驗看甫畢重歎吁橫遭酷虐獨何
辜凜凜如生色不變全受但恨少完膚檢傷得實罪斯定按律而
懲曰惟命身為禍首復何言得免株連死已幸初怪囂頑同濟惡
出自威驅謹從薄又歎骨肉輕恩讐失在昏庸亦姑略惟是落落

女中豪體膚可挫志不撓百折千磨卒就義殉烈猶比殉節高近
來道碑在人口一時能傳未能久設無彤管揚其芬安得姓名垂
不朽據實臚陳求上聞立申天討誅淫昏并請如例得旌表慰及
重泉未泯魂猗嗟婦本小家子平昔何曾讀經史一朝隱禍構門
庭乃克奮身保廉恥報夫尚慕共姜義負夫肯同宣姜淫如此乘
舟可不作亡國何來桑濮音我官斯土將一載激揚風烈職有在
中壘手筆非所及記此聊備輜軒采

寧遠伯石坊歌 并序

邑

人李維楨

子棟進士

北鎮城內中街有石坊矗立形勢雄偉為明寧遠伯李成梁鎮
遼時紀功之遺構撫今念往歌以寄懷

崇坊劃破遙空碧中衢橫跨垂楊陌都人士女競翹瞻猶說當年
寧遠伯將軍遠系出勾驪鐵嶺曾留故宅基契必姓標蕃族籍道

真名噪將家兒

唐蕃將阿史阿杜
佺之子名道真

致身事主何須早四十諸生猶

潦倒一朝襲職總兵符風雷激盪舒雄抱有明萬厯寇氛滋邊警
紛傳羽檄馳插漢秦寧同犯境朵顏亦有董狐狸將軍簡卒羅豪
儁邊庭立見軍威振六郡旁搜雕面兒三門廣布連雲陣連雲列
燧接長郊突騎橫麾奮鐵鎗黑石炭來頻棄壘黃台吉敗慨焚巢
十年破虜恢雄畧甘泉聞捷羣欣躍郊廟通虔喜獻俘山河作誓
隆封爵獨憐顯德扼要衝屢荷將軍挫敵鋒四百里程馳雁塞十
三山驛熄狼烽殲渠馘寇紛難數邊功焜耀凌前古醜虜芟除南

北闕雄師復盪東西部軍威暢沂愜宸襟蟒服雲繒寵遇深驃騎
勳高新賜第內廷恩渥屢頒金苞苴締結連朝貴諸男騰蹕如霞
蔚黃口將軍擁虎牙蒼頭都尉矜羊胃將不宜驕古所箴貪饕矧
復中軍心三邊縱有餘威在六校其如暮氣深自古勳高取人怵
持盈保泰終無術汾陽晚節僅全名紛紛餘子奚足述將軍再起
建旌旂七十遐齡已白頭把兔兎亡矢倖厚樂羊子貴主恩優我
思訪古勤搜討難從戰地尋殘堡紅土城邊暗暮雲黃岡嶺畔迷
秋草獨留傑構轟穹空哲匠雕鏤訝鬼工舌吐石狻威訕談翅鴛
鐵鳳勢玲瓏風侵雨蝕春如夢繁華賸有青山送朱明鼎祚已長
淪魏表石刻終奚用往蹟依回重歎嗟玄黃戰血幾蟲沙勳臣池

館猶湮圯何處荒臺覓翫花

陳石閣詩集載遠東有李寧遠翫花臺故蹟

癸未仲春登閣山觀音閣留宿三日歷遊諸名勝臨行不能

無感於中賦詩以紀之

潘陽進士繆裕紱東林

登山如作人務在求其高苟未造巔頂攀陟胡憚勞我生愛巖穴

著屐恣遊遨遇奇必一到性命輕鴻毛側聞醫巫閣頗稱山中豪

秩祀崇有虞神奇冠諸曹瞻望不可即中心誠怵怵駕言謁北鎮

乘風逐翔翹亭午升大閣

俗稱觀音閣為大閣

登躍如飛揉一草並一木寓

目無遁逃一花兼一石烟雲任揮毫果然壯大觀咳唾凌風騷美

哉衆丘壑俯視皆弁髦我殊未盡興遊覽復周遭天然望幽谷聖

水流滔滔何年蚪蚪碑宸翰施寵褒仙人石幻影雲巢松瀉濤既

入蓬萊境還訪天台桃小桃源在聞見宜云隘殊難飽貪饕我欲

從青蓮問天首頻搔如此得佳勝胡為戀青袍誓將理梅鶴名心

適蓬蒿但韞孔匱玉不鼓呂望刀永遠拜山靈一洗紅塵囂

遊觀音閣留題僧舍

繆裕紱東林

渾似夙相識深山得解人高連禪界宿偶與客燈親石瀑能消渴
松風為掃塵俗緣殊未了草草歎吟身

醫巫問山雜詠 七絕四首

遠陽歲貢袁金鎰潔珊

三朝墨寶嵌石壁讀罷凄然感喟生如是雲山如是景當年輦路

尚分明

聽雨山中夜不眠亂峯流水漲飛泉萬松叢裏朝陽寺閒讀南華

秋水篇

醫巫閭扼營州勝北鎮魏義壇宇開手別薛苔看古碣此行端為
訪碑來

帝輦東巡遺勝蹟行宮規制尚依然門牆整肅資丹雘曾費軍需
幾萬錢

留日時偶成

邑

人孟憲彭

海秋
恩貢

航路通行徧五洲東瀛文物步西歐乘風破浪尋常事漫說宗生
是壯遊

閒中偶成

前人

潑墨天容未放晴小園散步劇關情兒童笑指雲來處問是風聲

是雨聲

北鎮先民七賢詠

進邑

士人李維楨紫棟

東丹王倍

武畧文謨兩擅長儲君何必握皇綱一軍掃蕩扶餘境萬卷珍藏
望海堂讓國竟追吳太伯浮家猶載越夷光任教介弟承洪祚孝
友孤衷久自彰

梁正憲公肅

高官游擢勵清勤愛國憂民志逸羣出聘不慙詳問使傳經濟化
羽林軍深宮諫獵天顏喜舊道防河水勢分至竟正人邀睿鑒頽
齡詔許返榆枌

耶律文正公楚材

廷對才超十七人早於壯歲裕經論好生屢弭兵戎禍定策無慙
社稷臣今革羊羔防利重諫收牝馬恤民貧試披庚午西征曆月
蝕精推倍可珍

劉文正公秉忠

英年投筆氣軒昂遇主真如漢子房一代典章歸手創萬端經緯
敢身當逃禪聊拜靈山佛設世猶封異姓王回手上都宏建築長
留遺蹟在龍岡

賀給事欽

靈飭躬修慍近思心能主敬絕紛馳擢科早列龍門榜講學常遵

鹿洞規黃閣上書懋內侍白沙肖像得賢師釣臺春草年年綠故
老猶尋梓里祠

秦制軍世禎

巡蘇守浙布深仁江左同欽幹濟臣懋役奏章防蠶尾量田細冊
創魚鱗漁船列籍民姦絕戰艦增兵士氣新良法上陳垂令甲千
秋永沐澤如春

李制軍棲鳳

韋布何慙命世英鉅艱擔荷出諸生開藩能察荆湖吏橫海曾麾
粵嶠兵龍頂岡頭新破敵烏蠻境內遠傾誠功成衣繡還鄉里身
後猶叨賜葬榮

醫巫閭山曠觀亭

江東楊圻

閭山曠觀亭高宗巡幸詩有曾聞萬卷貯山亭之句蓋山有望海堂為遠太子耶律貝藏書之所太子性喜風雅此亭或亦為其所建年久廢圮戊辰秋廣寧縣邑侯王晦菴先生重修此亭適余遊遠東先生因齊興華內翰囑題

北鎮巫閭第一峯但餘樵牧說遠宮當時耶律耽文史不讓昭明萬卷風

翠華想像踏雲來八駿東遊萬壑開讀罷天題遠海上穆王去後北風哀

突兀孤亭雲氣中空山萬歲此呼嵩百靈呵護今何在不及先生

守土功時聞高宗裕陵被南軍盜發

北鎮王邑侯晦菴重建曠觀亭落成介僚友齊君興華屬為
作記志文八歲即知醫巫問者天下名山心焉慕之然相去
萬里今且六十歲矣隨臨溟府主出關乃適會茲亭之成晦
菴不棄徵及拙作俾我譎陋坳迹名山何其幸也下筆務慎
恐玷山靈逾月而文不就僅成四詩告人謂入境觀其山川
道路即知地方長吏之賢否余雖未識晦菴而有以知其政
事之善也詩中三致意焉

萬峯新綠結瓏玲信道名山有中興關外風流正輝映廿年重話
角山亭

宣統間吉林陳中丞簡始葺角山亭自為詩張之揭陽曾剛甫和作余成詩遲遂未刻石

遠儲風雅人何處純廟天章世僅傳不有瑯琊賢令尹阿誰潤色列雲煙

山頂望海堂為遠太子藏書處茲亭云亦同時所建然不可考今所傳誦者惟清高宗一詩耳

名區勝地七百載斯是巫閭第幾峯九十五亭書漢志獨無史筆紀遼東

後漢書郡國志所記為亭九十有五此亭闕繫遼東文獻而一統志盛京通志皆不載亦無私家著述茲後起之責也

風雨蕭蕭望海堂圖書一例感滄桑憑君更寫娜環記好為名山
補舊藏

清高宗詩有萬卷山亭之句是此地與望海堂皆當日藏書之
所也

民國十有七年歲在戊辰仲秋南海梁志文題

重修醫巫閭山曠觀亭賦

亭為遠太子藏書所清高宗詩有萬卷山亭語今邑侯王君
晦菴重修作賦以勒石

探奇策府長揖山靈邈彼絕域翼然有亭檐甍聳翠林壑競青萬
松列障四山作屏控雄圖於北鎮放鉅眼於東溟發羽陵藏書之

秘貌燕然勒石之銘厥有名山曰醫巫閭珠河遙互誓臺已墟亭
荒秀覽樓罷妝梳無秦岱登封之碣異天臺隱士所居琳琅積石
璀璨精廬紫荆漫探郡主青藜偏燭皇儲有曠觀亭焉白雲往還
丹石磊砢結構嶺寄卜居爽塏穆王不來昭明安在歎經史兮全
無睇江山兮易改隔危臺兮障鷹鄰故堂兮望海獨立蒼茫目窮
千載丹漆興修瑯琊邑侯地窮遠左人立峯頭謨觴石室文賦選
樓天章彪炳匠氏雕鏤繫望古今遙集感華室兮山邱惟荒亭兮
嘗在羗萬歲兮千秋嗟呼金泥玉簡易陳迹矣天祿石渠感今昔
矣矧夫別殿離宮銷沉金碧傑閣崇臺荒涼黍麥獨此亭也密邃
雲扃卓立山脊縱自林巒佳氣日夕觀碑鋪索靖之毡游山齒謝

公之履仿歐陽修醉翁之記泐温子昇韓陵之石芟穢誅茅濡毫
篆額斯則繇遠太子之風流而仰賢使君之擘畫者也歌曰萬卷
山亭宸翰麗置身絕頂秋風厲日千里兮一亭孤紅葉連山兮碧
天無際

民國十有七年戊辰季秋常熟宗威